

UGÁNU BUÍTI LE LABÛRÛJABEI JUAN LUÁGU JESÚSU

Liábígüle Búngiu Irájü ubouágun queísi Wügúri Garaúwarügüti

1 ¹Dan le lagúmeserunbei sun cátei, níjeinjali meja Dimúrei (le ámu íri lun Búngiu Irájü), lúmañein Búngiu le Dimúreibeí, áni Búngiu méme ligía. ²Lídan lubeíti lagúmeserunbei sun cátei, lúmañein Búngiu Úguchili Búngiu Irájü. ³Lídaangiñe ladúgei Búngiu sun cátei, úati ni cáta adügúti le máma ladúga. ⁴Ligía íchugubei ibágarí lun sun cátei, áni ligía arúgoungadagüdübei jáu gürígia. ⁵Rúti larúgounga queísi lámpu lídan lubúriga, áni lásiñerubei lubúriga lámpu ligía éñegucha.

⁶Ñíñein meja ában wügúri loúnajan Búngiu, gírítí Juan, le ñúbinbei lun líchugun fe luágu Búngiu Irájü le lúnbei liábin ubouágun lun larúgoungadágüdün jáu gürígia. ⁷Juan, lúntí líchugun fe luágu, lun gayáraabeí lan jafíñerun sun gürígia luágu cátei le lúnbei laríñaguni dánme le liábin. ⁸Máma Juan le lúnbei larúgoungadágüdün jáu gürígia, ában wügúri ligía le oúnajoúbei lun ladímurejaba lan luágu. ⁹Búngiu Irájü, le queísigubeirügübei ában lámpu le tímatimaati lun larúgoungadágüdün jáu sun gürígia, lachúlürüña meja ubouágun lídan dan ligía.

¹⁰Ñúbinti ubouágun, áni láu sun lídaangiñe lan ladúgei Búngiu ubou, manügün jamúti lirájüñü ubou quei Búngiu Irájü. ¹¹Lageíroun yebe liábin, merésibirun jamúti lílana lageíra. ¹²Láu sun líra, añájein erésibiruti, ába jafíñerun luágu, ába líchugun ubáfu joun lun lirájüñübaña lan Búngiu. ¹³Mítaraantiñatia quei jasáanigu agúbürigu ja gürígiabaña, ja agúriajouítiña quei furúmierügü gürígia o láu lan lugúndan ában wügúri, lirájüñü Búngiu jagía.

¹⁴Ligíratí meja le Dimúreibeí, le méme Búngiu Irájübei, ñúbinti lun ítara lúba lan quei furúmierügü gürígia, ába laganoúniwa wádan. Arija wamúti

luweírigun, uweíriguni le ladúnabei Liraú Búngiu le ábanrügüti, le buínbei láu areíni lúma inárüni. ¹⁵Adímurejati Juan luágu, ába laríñagun.

—Niján léñaja uágubei nadímureja jun dan le naríñagunbei luágu le lan ubábei naráanseja úma, weírigutima lan sügú náu, ladúga níjeinjali lán meja lubáragiñebei nagúriajoún.

¹⁶Sun wágia ibíjaadiwa sarágu abíniruni lídaangiñe luweírin lírisin.

¹⁷Lúmagiñe Moisés lerésibirúa lilúrudun Búngiu, ánjeinti ínsiñeni lúma inárüni, lídaangiñe Jesucrístu liábin. ¹⁸Úgali ni ában aríjiti Búngiu, Liraú le ábanrügübei le yaráfabei tun lanígi, ligía arúfudubalin woun ída líña lan Búngiu.

Ladímurejan Juan le abásteragüdajabei luágu lufúleisein Jesucrístu

(Mt. 3.11-12, Mr. 1.7-8, Lc. 3.15-17)

¹⁹Ába joúnajan jurú ja Jerusalénna fádírigo jáma wügúriña jádaangiñe ladúgawagun Leví álügüdei Juan cáteinein lan. ²⁰Ába laríñagun joun furáangu.

—Máma áu Crístu.

²¹Ábayati jálügüdüni.

—¿Cátabuti? ¿Proféta Elías amúrü?

Laríñaga joun.

—Uá, máma áu.

Ábaya jaríñagun lun.

—¿Amúrü proféta ligíra le lúnbei liábin?

Ába laríñagun joun.

—Máma gíñe áu.

²²Ábati jaríñagun lun.

—¿Cátabuti? Mósutia wanügüni boúnabagüle joun ja oúnajabaliwa.

¿Cági gayáraabei baríñagun woun buoúgua?

²³Ába loúnabuniña láu méme dimúrei lé meja laríñagubei proféta Isaías.

—Áu ában le agúarajabei lídan fulásu le mageírawati. “Aráanse jumóun janígi lubá liábin Wabúreme queísi ladárarúniwa úma surúti.”

²⁴Ja ñúdümbaña adímureja lúma Juan, lánigu jadámurin fariséogu, ²⁵ábati jaríñagun lun.

—Ánjeinti máma bubeí Crístu, ni Elías, ni proféta ligía, ¿cáti uágu babásteragüdaja?

²⁶Ába laríñagun joun.

—Áu, láu dúna nabásteragüdaja, njein ában ibídiñeti jun jagánagua, ²⁷liábinba nárigiñe, wügúri ligía, madúnatina ni lun jamúga nafáragaduni tagúriuga ligeídin.

²⁸Sun cáte le, lídan fulásu le gríbei Betábara lasúsereda, luágu oúbaü le ñígiñe lubeí láfuara wéyu libíti dúna Jordán, le ñí lubei labásteragüdaja Juan.

Wügúri le loúnajabei Búngiu lun loúnwen luágu jafígoun gürígia

²⁹Larúgan, ába laríjin Juan liábin Jesúsu ayárafadeina lun, ába laríñagun joun lánigu.

—Niján le loúnajabei Búngiu lun loúnwen luágu jafígoun güirgía queisi meja lafarúniwa mudún lídan dan ligía luágu jafígoun güirgía. ³⁰Luáguñaja nadímureja dan le naríñagunbei. “Liábinba ában wügúri nárigiñe le weiríguti sügú náu, ladúga njeinjali lán meja lubáragiñe nagúriajouún.” ³¹Ni áu, ibídiñetí meja wügúri ligía nun, abásteragüdajádina láu dúna lun jasúbudiruni Israelítagu.

³²Aríñagati gíñe Juan.

—Aríja numúti Sífiri Sándu camá ában únjun, larárirun siéluigiñe, ába laráramagun lábulugu. ³³Ibídiñetí yebe nun cátei lan wügúri ligía, aríñagarúgaali meja le oúnajabalina abásteragüdaja láu dúna, nun. “Dánme le baríjin larárirun Sífiri Sándu ábame laráramun lábulugu itaga wügúri, ligía wügúri ligía le abásteragüdajabei láu Sífiri Sándu.” ³⁴Aríja náaliti, geféen áu luágu ligía lan Liraúbei Búngiu.

Furúmiñetiña láni Jesúsu disípulugu

³⁵Larúgan, ññeinya Juan jáma biáma jádaangiñe lánigu. ³⁶Dan le laríjinbei Juan lásügürün Jesúsu, ába laríñagun.

—Niján wügúri le lanúadirubei Búngiu lun lagídaruni jafígoun güirgía.

³⁷Ába jagáambuni biáma lánigu Juan laríñagun ítara, ába jafálaruni Jesúsu. ³⁸Ábati ladígiragun Jesúsu lárigoún, quei laríjin jafálaruni, ába laríñagun joun.

—¿Ca jabúseerubei núma?

Ába jaríñagun lun.

—Maésturu, ¿jalía bagánawa?

³⁹Ába laríñagun Jesúsu joun.

—Jigoúgu jaríjei.

Ába jouúdin, ába jaríjini jalía lan lagánawa, ába jásügürüni líbiri wéyu ligía lúma, ladúga queíburijali lan gádürü rábounwéyu óra ligía.

⁴⁰Andrés, le lamúlen Simón Pédro, ligía ában jádaangiñe biáma ja agáambubalin le laríñagubei Juan ába jafálaruni Jesúsu. ⁴¹Lubáragiñe ámu cátei, ába lídin Andrés álugei Simón Pédro le líbugaña, ába laríñagun lun.

—Darí wamaali Mesías, le Crístu, le lanúadirubei Búngiu lun lasálbaruniña güirgía lídaangiñe jafígoun.

⁴²Ába lanúgüni Andrés Simón le ññjin lubei Jesúsu, ába laríaguni Jesúsu Simón ligíbuagun, ába laríñagun lun.

—Simón, amúrü le liraú Jonás, guetó Céfasha bíri, míni lan íri le. Pédro, o dúbü.

Lanúadiruniña Jesúsu Felípe lúma Natanaél lun lánime disípulugu

⁴³Larúgan, ába larítagun Jesúsu lídin loúbawagun Galiléa, ába ladúnragun lúma Felípe, ába laríñagun lun.

—Falábana.

⁴⁴Felípe ligía, Betsáidana le ñí lubei gíñe lagánawa Andrés láu sun Pédro. ⁴⁵Ábati lídin Felípe áluajei Natanaél, ába laríñagun lun.

—Aríja wamáali wügüri le uágubei labürüja Moisés tídan líburu to lánina lilúrudun Búngiu, le gíne uágubei jabürüja profétagu—Jesúsu le liraú José le Nazarétna.

⁴⁶Ába laríñagun Natanaél.

—¿Níjein funági Nazarétna buíti?

Ába laríñagun Felípe lun.

—Jigábu baríja.

⁴⁷Dan le laríjin Jesúsu layárafadun Natanaél, ába laríñagun.

—Nitén ában ladúgawagun Israél le tímatimaati, úati yéguauí lídan.

⁴⁸Ába laríñagun Natanaél lun.

—¿Ída liñági basúbudirunina?

Ába laríñagun Jesúsu lun.

—Aríja numútibu lubáragiñe lagúarun Felípe bun, dan le tábugiñeñadibu lan tídibu ígo.

⁴⁹Ábati laríñagun Natanaél lun.

—Maésturu, amürü Liraúbei Búngiu, amürü jarúeitebei Israelítagu.

⁵⁰Ába laríñagun Jesúsu lun.

—¿Bafñerunbei nun ladúgarügü naríñagun bun luágu aríja nánibu tábugiñe tídibu ígo? Baríjubati cátei weínamutimáati lueí le.

⁵¹Aríñagati gíne Jesúsu.

—Nináriin jáu, luágu jaríjubei lan siélu junréñu, añájame láni Búngiu ánjeligu aweíña luma arárija nougiñe, áu le Wügüri Garaúwarügüti.

Ában maríei lídan fulásu le gíribei Caná, le lídaanbei Galiléa

2 ¹Úrüwa wéyu lárigiñe, nínñein ában maríei lídan ában fulásu gíriti Caná, le lídaanbei Galiléa. Nínñounti lúguchu Jesúsu, ²amísurajoúati gíñeti Jesúsu jáu sun láni disípulugu lídoun maríei ligía. ³Ába tagúmuchun diweín, ába taríñagun lúguchu Jesúsu lun.

—Gumújatia diweín.

⁴Ába laríñagun Jesúsu tun.

—¿Cági uágu baríñagei le nun, nóguchu? Machúlügili dan lun nídejan lídan cátei le.

⁵Ába taríñagun joun ja éjeeragubaña.

—Adúga jumeí sun le laríñagunbei jun.

⁶Nínñoun sísi dináa láutu dúbü tíbe to jayúsuruboun juríu lun jachíbagun jóungua según jagáburi. Ságü ában dináa tugúya, barútu wein o darándi gámun dúna. ⁷Ába laríñagun Jesúsu joun éjeeragutiña.

—Buíngüda jumoun sun dináa to láu dúna.

Ába jabuínchagüdünun buídu buídu. ⁸Ábati laríñagun Jesúsu joun.

—Dabú jumati murúsun tídaangiñe, ábame janúgüni lun le aríjubei láu fédu.

Ába jadúgüni ítara. ⁹Ábati louchuni le aríjubei láu fédu dúna ligía salígua lun diweínme, ibídiñoun lun jalágiñeti lan, ja rügüñanu

éjeeragubaña asúbudirei, ladúga jagía lan adáburubalin dúna. Ábati lagúarun le aríjubei láu fédu lun le amárieidubei, ¹⁰ába laríñagun lun.

—Sun gürígia seríwi jamútu tubuídun-ágei diweín furúmiñe, dánti le guráaña amísurajóutiña gíbe, ligía jéjeeragun diweín to furúmieguaügü, ánjeinti amúru, ába bareídunun tubuídun-ágei diweín darí guetó baságaroun.

¹¹Cátei le, le ladúgübei Jesúsu lídan fulásu le gírubei Caná le lídaanbei Galiléa, ligía furúmiñetibi miláguru le áubei larífudei luweírigun, ába jafíñerun láni disípulugu luágu.

¹²Lárigiñe cátei le, ába lídin lídoun fulásu le gírubei Capernaúm, úara túma lúguchu, lamúlenu, jáma láni disípulugu, ába jeréderun átiri wéyu ñi.

Labúgaguniña Jesúsu alúgurajatiña témpulurugugiñe

(Mt. 21.12-13, Mr. 11.15-18, Lc. 19.45-46)

¹³Ábati lídin Jesúsu ubúругu Jerusalén ladúga yaráfaali lan jafédun juríu le lánina páscua. ¹⁴Ñi ladárriraña ja alúgurajabaña bágasu, mudún, únjun, jáma buri ja núnbaña lídan jabára le ñi lubei jasáansija seínsu joun gürígia. Lídan түbúrürü témpulu ladárriraña sun gürígia ja. ¹⁵Dan le laríjinbalin Jesúsu cátei le, ába ladúgün ában labeñjagüle láu gúrudu, ába labúgaguniña sun jagía lídaangiñe түbúrürü témpulu jáu sun jalúgüniña mudún jáma bágasu. Chagálei jaseínsun ja asáansijabaña seínsu, garábagualeí jadábulan. ¹⁶Ába laríñagun joun ja alúgurajabaña únjun.

—¡Sagájumei sun cátei le yágiñe! ¡Manüga jumoún lúban Núguchi lun jalúguraagüleme!

¹⁷Ábati jaríttagun láni disípulugu luágu laríñawagún tídan líburu to Lerérun Búngiu. “Jángitina táu búban táu sun nanígi.”

¹⁸Ábati jaríñagun juríu lun.

—¿Ca miláguru barúfudubei woun lun wasúbudiruni ánjein garícha bubei lun badúgüni cátei le?

¹⁹Ába laríñagun Jesúsu joun.

—Güríngua jumoún témpulu to, naráramagüdayaboun lídan úrüwa wéyu.

²⁰Ába jaríñagun juríu lun.

—Bíán-wein-sísi irúmu janúgün adúgoun témpulu to, ¿lun biyáraaboun lan aráramagüda lídan úrüwa wéyu?

²¹Lúgubu guánarü Jesúsu témpulu to uáguboun ladímureja joun.

²²Ligía dan lubei le lásaarun lídaangiñe ouweni, ába jaríttagun luágu dimúrei lé meja laríñagubei, ába jafíñerun luágu sun le tídaanbei líburu to Lerérun Búngiu lúma luágu dimúrei buri lé meja laríñagubei joun.

Subúsiti le tídaanbei janígi gürígia lun Jesúsu

²³Dan le Jerusalén lubei Jesúsu lídan fédu le lánina páscua, sarágu jáña affínerutiña luágu dan jaríjinbaalin miláguru buri le ladáagubei lun larífuduni luágu ligía lan Crístubei. ²⁴Ánjeinti Jesúsu, míchaagunti lúngua jájaburugun

ladúga subúdi lánina cátañañanu lan. ²⁵Mabúseerunti laríñawagúniwa lun ída jáña lan güirígia, ligía lúngua subúdi lumúti cátei lan tídaanbei janígi.

Jesúsu lúma Nicodémo

3 ¹Níñein ában wügúri lánina jadámurin fariséogu, ába jádaangiñe jábutigu juríu, giriti Nicodémo. ²Ába lídin Nicodémo ayánuja lúma Jesúsu gúñoun, ába laríñagun lun.

—Maésturu, subúdi wamúti luágu Búngiu lan oúnajabalibu arúfudaja woun, ladúga úati ni ában lun gayára lan larúfuduni lubáfu láu miláguru quei badúgüni ánjein úa lubei Búngiu lúma.

³Ába laríñagun Jesúsu lun.

—Ninárün báu luágu le lan magúriajoúnwayati, siñáti lebélorun lídoun larúeijan Búngiu.

⁴Ába laríñagun Nicodémo lun.

—¿Ída lubági lagúriajoúnwaya ában wügúri weíriyaali? ¿Gayáraati funági lebélorunya turágeirugun lúguchu lúnya tagúriajani?

⁵Ába laríñagun Jesúsu lun.

—Ninárün báu luágu le lan magúriajoúnti lídaangiñe dúna lánina abásteruni, lúma lídaangiñe Sífiri Sándu, siñáti lebélorun lídoun larúeijan Búngiu. ⁶Le agúriajoúbei jádaangiñe agúbürigu ja güirígiabaña, ítara líña ligáburi queísi jagáburi güirígia, le agúriajoúbei lídaangiñe Sífiri Sándu, ítara líña ligáburi queísi ligáburi Sífiri Sándu. ⁷Maweíridalá banígi luágu naríñagun bun luágu lúnti lánya jagúriajoúniwa sun güirígia. ⁸Ítara quei láfurun garábali le nígiñe lumúti labúseera, agáambabei lamúri, ibídiñeti bun jalíagiñe lan liábin ni jalíñoun lan lídin, ítara jáña gíñe sun ja agúriajoúbaña lídaangiñe Sífiri Sándu.

⁹Ábayati laríñagun Nicodémo lun.

—¿Ída lubásan cátei le?

¹⁰Ába laríñagun Jesúsu lun.

—Ába oúnwenbun maésturu Israélna amúrú, ¿ibídiñeti cátei le bun?

¹¹Ninárün báu luágu le lan wasúbudirubei, ligía lan wadímurejabei, geféen wagía luágu le aríja wamáalibei, jugúya fariséogu, mafíñetün luágu le waríñagubei jun. ¹²Ánjein mafíñen jubei nun dan le nadímurejan jun luágu buri cátei le lánina uboú, ¿ída lubági jafíñera luágu le lánina siélu?

¹³Úagili ni ában amúdeiruti siélun, lárigiñe ába larárirun nígiñe lun gayára lan geféen lan luágu nueídügüya, áu le Wügúri Garaúwarügüti, le gábanbei siélu. ¹⁴Ítara queí meja liñúrunun Moisés tiyáwa jéwe luágu wéwe lídan fulásu mageírawati lun jasálbaruba lan sun ja arjítiña tuágun, ítara liñá giñe niñurúaba lan luágu gurúwa ¹⁵lun sun lan le affíneruti nuágu, mídin lámuga máfiougati, siélun lámuga lídin abágarida ában ibágarí le magúmuchaditi.

Lísiñejabu Búngiu joun gürígia

¹⁶‘Weíríti jínsiñe gürígia ja ubouagubaña lun Búngiu darí lun loúnajanina, áu le Liraú le ábanrügüti, lun nouwen luágu jafígoun, lun sun lan ja affñerutiña nuágu, mídin jamámuga máfiougati, siélun lámuga jóudin, abágarida ában ibágarí le magúmuchaditi. ¹⁷Moúnajan lumútina Búngiu áu le Liraú ubouagun lun níchugun jadúnrun gürígia, loúnajanina lun jasálbarun ja ubouagubaña nuágu.

¹⁸‘Le affñeti nuágu, áu le Liraú Búngiu, barú lumuti Búngiu quéisi madúnrunti, ánjein le maffñeti, gadúnrunjali ligíbugiñe Búngiu ladúga maffñen lan nuágu, áu le Liraú Búngiu le ábanrügüti. ¹⁹Ja maffñebaña, gadúnrunjaña ligíbugiñe Búngiu ladúga dán buga le niábinbei ubouagun lun narúgoungagüdün láu, gúndaatimaatiña lílana ubou láu lubúriga sügú láu larúgounga, ladúga cátei lan wuríbatí jadáagubei. ²⁰Sun ja adúgübaña cátei wuríbatí, iyéreeguti larúgounga joun, ába jadísedun lueí larúgounga ligía, lueí lasúbudirúniwa cátei wuríbatí le jadúgübei. ²¹Ja adúgübalin lugúndan Búngiu, jínsiñeti joun lun lídan jamá larúgounga lun laríjiniwa luágu jarúma lan le jadúgübei, láu lubáfu Búngiu.

Ladímurejaanya Juan luágu Jesúsu

²²Lárigiñe sun cátei le, ába lídin Jesúsu jáu lání disípulugu Judéoun, ába leréderun átiri dan ñi, abásteragüdaja. ²³Ñíñein gíñe Juan abásteragüdaja lídan fulásu le gíríbei Enón, yaráfa lun Sálím, ladúga ñíñein lan sarágu dúna, ába buríti jayábingua gürígia, ába jabásterun. ²⁴Lubáragiñe ladaürún Juan lasúsereda sun cátei le.

²⁵Ábati jagúmeserun jádaangiñe lánigu Juan asígeneja jáma juríu luágu igáburi le lánina arúmaduni. ²⁶Ábati jóudin aríñaga lun Juan.

—Aríjabásan maésturu, wügürí lé buga búmabei luágu óubaü le ñígiñe lubeí láfurida wéyu libíti dúna Jordán, le ligíra lé meja uágubei badímureja woun, guetó labásteragüdajaña gürígia áni jafálaruñeíti sun gürígia.

²⁷Ába laríñagun Juan joun.

—Siñáti njein lan ni cáta lúma ni ában gürígia ánjein máma lubeí líchugun Búngiu lun. ²⁸Agáamba jumúti lubeígia naríñagun jun furáangu luágu máma lan áu Crístubei, luágu áu lan ában le oúnajóubei lubá. ²⁹Lídan ában maríei, adári ligía táubei ladári. Léti lumáda adári, le ñíbei agáambeí, oúnwenbun lugúndan láu lagáambuni ladímurejan. Ítara níña gíñeti, oúnwenbun nugúndan luágu Jesúsu, ³⁰ligía lúnti laweírígudúntima, áu lun nú nabudúntima.

Le ñúbinbei siéluigiñe

³¹‘Jesúsu, le ñúbinbei siéluigiñe, jóugiñeñein sun gürígia. Áu, múaruguna áu, áni lérügüñein lánina ubou gunfaráanda nan. Ánjein le ñúbinbei siéluigiñe,

jóugiñeñein sun güriquia, ³²luágu gíñe le aríja láalibei lúma le agáamba láalibei ladímureja, mibetiña affñerutiña luágu le laríñagubei. ³³Ánjeinti le affñeruti, lachoúrurubei luágu inárüni lan le laríñagubei Búngiu, láu laffñerun. ³⁴Le loúnajabei Búngiu, lerérun Búngiu ladímurejabei, ladúga mébejati líchuguni Búngiu láni Espiritu lun. ³⁵Jínsiñeti Liraú Búngiu lun, rúlaali gíñe sun cátei lújaburugun. ³⁶Le affñebei luágu Liraú Búngiu, gabágariti le magúmuchaditi, ánjeinti le májabei laffñerun luágu Liraú Búngiu, mabágaribei líbe ibágarí ligía áni mebélurunbei siélun, láburujarügüba ligáñi Búngiu luágu.

Jesúsu túma wúri to Samariána

4 ¹Aba jagáambun fariséogu luágu gíbetima jamá lánigu Jesúsu sügú jáu lánigu Juan, áni gíbetima güriquia ñúbintiña lun, lun jabásterun, ²láu sun máma lan Jesúsu abásteragüdajabaliña, lánigu abásteragüdajabaña. ³Dan le lasúbudirunbalin Jesúsu cátei le, ába láfuridun Judéagiñe lun lagríbudun Galiléoun.

⁴Lídan weíyaasu ligía lásügürübati loúbawagugiñe Samária. ⁵Ítara liñáti lachülürün lídoun ában fulásu lídan Samária grítiti Sícár, yaráfa lun múa lé meja lígirubei Jacób lun José le liraú, le ában jádaangiñe binádu wagúbürigu. ⁶Ñíñein wélu le únbei jagúara luwélun Jacób, queíti buchá lan luágu Jesúsu eíbuga, ába lañúurun láru wélu ligía. Queí buri amídirugu óra ligía. ⁷Tiábijati ában wúri Samariána adábura dúna lídaangiñe wélu le, ába laríñagun Jesúsu tun.

—Rúba dúna nun.

⁸Añángüiratí buga láni disípulugu agáñija eígini ubúru. ⁹Ábati taríñagun wúri Samariána to lun Jesúsu.

—¿Ída liñági bamúriajanbei dúna núma, larigiñe juríu ban, nugúya Samariána?

(Mínsiñeguatiñati juríu jóungua jáma Samariána.) ¹⁰Aba laríñagun Jesúsu tun.

—Lun jamúga subúdi báni edéweejani le líchugubei Búngiu, subúdibei jamúga cátei lan le amúriajabei dúna búma, bamúriajaña jamúga núma, ába jamúga níchugun ában luwúyeri dúna le gayáraati líchugun ibágarí bun, bun.

¹¹Aba taríñagun lun.

—Úgubeíti cába lan áu badábura dúna áni julíli wélu le, ¿ída lubáti bíchuguni luwúyeri dúna ligía nun? ¹²Jacób, lé meja binádu wadúgawagun, ígirubalin wélu le woun, guráti meja dúna lídaangiñe jáu sun lirájüñü jáma lilúgüniña. ¿Weírigutibu funági sügú láu Jacób?

¹³Aba laríñagun Jesúsu tun.

—Sun ja átubaña lídaangiñe dúna le, jamágürabudayaba, ¹⁴ánjein le átuti lídaangiñe dúna le níchugubei, mamágürabundügüyaali, ladúga dúna le lúnbei níchuguni lun, géseséenbei lídan lun líchugun ibágarí magúmuchaditi lun.

¹⁵Ábati taríñagun lun.

—Rúbei dúna ligía nun, masándirundügüyaadina lámuga mágürabu, miábin nugúyame ya wélurugu adábura dúna.

¹⁶Ába laríñagun Jesúsu tun.

—Beíba ougei búmari le úmabei bamárieida, ábame biábin.

¹⁷Ába taríñagun lun.

—Mámaritina le maríeitina lúma.

Ábati laríñagun Jesúsu tun.

—Binárün láu baríñagun luágu mámari ban le maríeiti búma, ¹⁸ladúga seíngüjáña wügúriña úmatiña bagánawa, áni mamárieiduntibu lúma wügúri le úmabei bagánawa guetó. Aríñagaadibu inárüni.

¹⁹Dan tagáambubalin wúri to cátei le, ába taríñagun lun.

—Afíñetina luágu proféta ban. ²⁰Binádu wagúbürigu ja Samariána, judúguatiña meja lun Búngiu ya luágu wúbü lígita, ánjein jugúya juríu, aríñagatün luágu Jerusalén lan fulásu le lúnbei ñi lan wájuduragua lun Búngiu.

²¹Ába laríñagun Jesúsu tun.

—Afíñebá nun luágu nítebei lan dan lun jájuduragun lun Búngiu mídinga jugúya luágun wúbü lígita, ni jídin Jerusalén. ²²Jugúya Samariána, ibídiñeti jun ca lan un jájuduragua, ánjein wagía, subúdi wamúti ca lan un wájuduragua ladúga lídaangiñe warásan wagía juríu liábin asálbaruni. ²³Lachúlürüba óra, áni niján óra ligía, lun mebéresenwa lan jalía lan jájuduragua gürígia lun Búngiu. Le lúnbei lebéreserunwa láu, ída líña lan ligáburi jájuduragun lun. lúnti jadúgüni táu sun janígi lídan ában luwúyeri le áuti lagúndaara Búngiu, según lerérun. Niján luwúyeri ájuduraguni le láluajabei Búngiu jámangiñe gürígia. ²⁴Espíritu Búngiu, ja ájuduragubaña lun, lúnti jadúgüni láu sun janárün, mebéresenga láu cátei le arijúati.

²⁵Ába taríñagun lun.

—Subúditi nun luágu liábinba lan Mesías le gíribei Crístu, dánmeti liábin, lafúnraanguagüdübei sun cátei woun.

²⁶Ába laríñagun Jesúsu tun.

—Áu Mesías ligía.

²⁷Ligiati jachúlürün láni disípulugu, ába laweíridun janígi láu jadáriruni Jesúsu adímureja túma ában wúri, úati ni ában ganígiti lun lálügüdajan ca lan tabúseerubei o ca lan uágu layánuja túma. ²⁸Ábati tígirunun wúri tugúya tidína, ába tídin ubúrugu ougaña gürígia, ába taríñagun joun.

²⁹—Jigoúgu jaríja ában eyéri aríñaguti sun cátei le adúga náalibeí nun. ¿Mámadügü funásan ligía Crístubei?

³⁰Ábati jóudingua ubúruguigiñe lun le ñíjin lubeí Jesúsu. ³¹Añájati buga disípulugu ayúmuragua lun Jesúsu lun leígin. ³²Laríñaga joun.

—Níjein cátei lun neígini le ibídiñeti jun.

³³Ábati jagúmeserun disípulugu álügüdagua jámagua, ába jaríñagun.

—¿Máfuna barújaña eígini lun?

³⁴Ába laríñagun Jesúsu joun.

—Nadügüni lugúndan le óunajabalina, agúmuchi luwádigimari, ligía neíginbei. ³⁵Jugúya aríñagatün. “Níjeingua gádürü játi lubá alúbajani.” Ánjein áu, nariñajare jun. Aríja jumeí nádü, dánjali lun lalúbajoún. ³⁶Le ñadágimeinbei alúbaja, ibíja lumúti lafáyeirujaja, áni cáteiti le lalúbajabei, gürígia, lun jabíjini ibágari le magúmuchaditi siélu, lun lagúndaarun le ábunagubei úara lúma le alúbajabei. ³⁷Quei le lubeíbei laríñawagún. “Ámu le ábunagubei, ámu le alúbajabei.” ³⁸Oúnaja náadün alúbaja le ní lubei mábunagun jumá, ámu ábunagubaña, jugúya alúbaja.

³⁹Sarágu jáña lílana fulásu ligía le láni Samária afíñerutiña luágu Jesúsu láu taríñagun wúri tugúya joun luágu aríñaga láni sun le adúga táalibeitun. ⁴⁰Dánti le jachúlürünbei Samariána le ní lubei Jesúsu, ába jayúmuragun lun lun leréderun jáma. Ába leréderun bián wéyu ñi, ⁴¹ábaya jafíñerun sarágu gürígia dan le jagáambunbalin le laríñagubei. ⁴²Ábati jaríñagun tun wúri tugúya.

—Mámarügaali luágu le baríñagubei woun wafíñera, ladúga agáamba wamáali gíñe lúmagiñe, áni subúdi wamúti luágu ligía lan Crístubei le lasálbaja ubóu.

Lareídaguagüdüni Jesúsu liraú ában ñadágimeinti lúma urúei

⁴³Bián wéyu lárigiñe, ába láfuridun Jesúsu Samariagiñe, ába lasígiruni luweíyasun loúbawagun Galiléa, ⁴⁴mídinti lageíra quei laríñaguni Jesúsu guánarü luágu madügüniwa lan gásu láu ában proféta lídan guánarü lageíra. ⁴⁵Dan lachúlürünbei Galiléa, resíbi jamúti lílana fulásu buídu, ladúga núdün jamá gíñe lídan fédu le lánina páscua Jerusalén áni aríja jamúti sun le ladügübei lídan fédu ligía.

⁴⁶Ábayati lagríbudun Jesúsu lídoun fulásu le Caná le lídaanbei Galiléa, le ní lubei lasáliraguagüda dúna lun diweínme. Níñeinti ában wügüri weíriguti, ñadágimeinti lúma urúei, níjein ában liraú sánditi lídan fulásu le gíribe Capernaúm. ⁴⁷Dan lagáambunbei wügüri ligía luágu núbinjali lan Jesúsu Judéagiñe lun Galiléoun, ába lídin aríjei, ába layúmuragun lun lun lídin lúbiñe lun lareídaguagüdüni liraú, ladúga madíseeli lan lun loúnwen. ⁴⁸Ába laríñagun Jesúsu lun.

—Jugúya, ánjaün maríjin miláguru, mafíñetün.

⁴⁹Laríñaga wügüri ligía lun.

—Queímoun furése lubáragiñe loúnwen niraú.

⁵⁰Ábati laríñagun Jesúsu lun.

—Giríhubá búbiñoun, areídagua biraú.

Ába lafíñerun wügüri ligía luágu le laríñagubei Jesúsu lun, ába lídin. ⁵¹Dan layarafadun tun lúban, ába jayábin lumúsuniña lubároun, ába jaríñagun lun.

—Magádieeli biraú.

⁵²Ába lálügüdüniña ca lan óra lagúmesera liraú areídagua, ába jaríñagun lun.

—Gúñaarü ladaúnrrün ában rábounwéyu lagídara abíruaü lueí.

⁵³Ába laríttaguni luágu ligía lan óra laríñagun Jesúsu lun luágu areídaguuali lan liraú, ába laffñerun luágu Jesúsu jáu sun lufámilian.

⁵⁴Ligía libíaman miláguru le ladúgübei Jesúsu dan le lagíribudunbei Judéagiñe lun Galiléoun.

Lareídaguagüdüni Jesúsu wügüri adádagaraali le Betésdana

5 ¹Lárigiñe cátei le, jadúgüña juríu ában fédu, ába lagíribudun Jesúsu Jerusaléoun luágu fédu ligía. ²Ñi Jerusalén, yaráfa lun béna le gíribei Jabéneri Mudún, níjein ában dúna, Betésda líribei lídan jerérun juríu, seíngüñein lubéneri. ³Sarágu jáña sánditiña roun ñi múarugu, ñíñanu maríjintiña, meíbuguntiña, jáma derégüdaña, jagúrabañañein lánjingichagun dúna. ⁴Ladúga níjeinja dan, liábin ában ánjeli siéluigiñe, ába lánjingichaguni dúna ligía, léti furúmiñeti sánditi le adáburuti lídoun dúna ligía lárigi lánjingichagun, ába lareídagun furúmiegurügü sándi le luágubei. ⁵Ñíñeinti ában wügüri, daráñdi-wídü irúmu láu láu sándi, ⁶dan laríjínbalin Jesúsu wügüri ligía roun, subúdileí átiri lan dan láu ítara, ába laríñagun lun.

—¿Buséntibu bareídagun?

⁷Ába loúnabun le sándihei.

—Úati cába lan anúgana lídoun dúna dan le lánjingichagun. Ságuí nálugun nadáburun, dabújali ámu nubáragiñe.

⁸Ába laríñagun Jesúsu lun.

—Sarába, budáboun bubárari, beíba.

⁹Lídan óra ligía, ába lareídagun, ába labúdunun lubárari, ába lagúmeserun eíbuga. Queíti lidáani lubeí eméraguni wéyu ligía, ¹⁰ába jaríñagun juríu lun le areídagubei.

—Wéyu le eméraguagülei ugüñe, moún lumuti banúgünun bubárari buoúgua.

¹¹Ába laríñagun joun.

—Le areídaguagüdübalina aríñagubei nun. “Budáboun bubárari, beíba.”

¹²Ába jaríñagun lun.

—¿Cáteigi le aríñagubei bun. “Budáboun bubárari, beíba”?

¹³Ibídiñetiti lun ca lan areídaguagüdübalin, ladúga gíbetiña güriáña ñi áni ñúdünja bugáti Jesúsu. ¹⁴Lárigiñe, ába ladúnragun Jesúsu lúma, témpulurugu, ába laríñagun lun.

—Guetó, quei areídaguagülei lubeí, mafígounjadügüyabá lueí ladágarun ámu cátei janárimetimaati buágu.

¹⁵Ábati lídin, ába lawísaruniña juríu luágu Jesúsu lan areídaguagüdübalin. ¹⁶Ligía lébubei jeíbaajani juríu Jesúsu lun jáfaruni jilágubei ladúga buri ladáaguni cátei líbe le lídan wéyu le eméraguagülei. ¹⁷Ába laríñagun Jesúsu joun.

—Ñadágimeinti Nóguchi chülú lúmoun dan le, áu ñadágimeintina gíñe.
¹⁸Ligiatimaati jabúseerunbei juríu jáfaruni jilágubei, mámarügü ladúga lálalachaguni lúru du le lánina wéyu le eméraaguagülei, ladúga gíñe líchaagun lúngua quei Búngiu láu laríñagun luágu Lúguchi lan.

Lugúmadin Liraú Búngiu

¹⁹Ábati laríñagun Jesúsu joun.

—Ninárün jáu, luágu siñá lan nadúgün, áu le Liraú Búngiu, ni cáta láu náni núngua, le rügúñein naríjubei ladúgün Nóguchi, nadúga. Sun le ladúgübei Búngiu Úguchili, adúga numúti gíñe, áu le Búngiu Irájü, ²⁰ladúga jínsiñetina lun Búngiu, arúfuda lumúti sun le ladúgübei nun, áni larúfuduba cátei weñnamutimaati nun, le lúnti laweíridun janígi láu. ²¹Ítara quei lásaaragüdüniña Búngiu Úguchili jiláaña lídaangiñe ouweni ába líchugun ibágari joun, ítara líña gíñe níchugun, áu le Búngiu Irájü, ibágari joun ja nabúseerun. ²²Magúseragüdünti Búngiu ni ában, rúrügü lumúti sun ubáfu nun, áu le Liraú, lun nadúgüni, ²³lun sun lan gürgía íchigei ában méme inébasei le jíchugubei lun Búngiu Úguchili nun. Le míchuti inébasei nun, áu le Búngiu Irájü, míchuti gíñe inébasei lun Búngiu Úguchili le ouñajabalina.

²⁴Ninárün jáu, luágu le lan eténiruti lun le naríñagubei lun, affñe ligía luágu le ouñajabalina, gabágariti le magúmuchaditi, masfadirúnwabei gíñe, sügújali lídaangiñe féridi lídoun ibágari le magúmuchaditi. ²⁵Ninárün jáu luágu nítebei lan dan, áni niján dan ligía, dánme le jagáambuni jiláaña numálali, ja ñüdümbaña láu le nubébei, gabágaribaña. ²⁶Ladúga gabáfuti Búngiu Úguchili lun líchugun ibágari, rújali gíñe ubáfu nun, áu le Búngiu Irájü, lun níchugun ibágari, ²⁷rújali gíñe ubáfu nun lun nagúseragüdüniña gürgía ladúga Wügüri Garaúwarügüti áu. ²⁸Maweíridalá janígi luágu le, ladúga lachúlürüba dan lun jagáambuni sun jiláguaaña numálali, ²⁹ábame jáfuridunga lídaangiñe jamúaja. Já meja arúfudubalin luágu nánigu jamá láu jadúgüni buíti ubouágu, jásaaruba lun jaganouñ lúma Búngiu lun sun dan, ánjañati ja arúfudubalin luágu lánigu jamá Máfia láu jadúgüni wuríbani, jásaaruba lun jasíadirúniwa lun máfiougati lun sun dan.

Larúfuduni Jesúsu lagúmadijan

³⁰Siñáti nadúgün ni cáta láu náni núngua. Quei laríñawagúniwa nun, ítara líña nagúseragüdün, áni buíti ligáburi nagúseragüdün ladúga mouchun nan lun nadúgüni le nabúseerubei, lueídügüya le labúseerubei Nóguchi le ouñajabalina. ³¹Ánjein áuba lubei geféen nuougua, mouñti le naríñagubei. ³²Níjein ámu le geféenbei luágu náni fuleísei, áni subúdiiti nun luágu le lan laríñagubei nuágu, gebégiti. ³³Jugúya ouñajatün álügüdei Juan nuágu, áni le loúnabagülebei jun, inárüni. ³⁴Áu magúrabuntina ladímurejan ni ában wügüri luágu nufuleisein, narítaguagüda rügüñaadün luágu le laríñagubei Juan nuágu

lun gayáraabei lan jaffñerun nuágu lun jasálbaruba lan. ³⁵Ítara liñá meja Juan quei ában lámpu le durúnguati, ru ligía larúgounga, áni jugúya aráanseñu jíña méjati lun jerésibiruni larúgounga ligía luágu murúsun dan. ³⁶Níjein ában cátei luágu nufúleisein buitimaati sügü láu le laríñagubei Juan. Lé buri cátei le nadúgübei, le méme buri uágubei laríñaga Núguchi nun lun nadúgüni, arúfuda lumúti luágu Núguchi lan oúnajabalina le tímatimaati. ³⁷Núguchi le oúnajabalina, arúfuda láali luágu áu lan Liraú le oúnajoúbei lun nasálbaruniña güriquia ubouágu, láu sun magáambun jumágili lan lumálali Búngiu, maríjin jumeí. ³⁸Mebélugili lerérun jídoun, ladúga maffñetün nuágu, áu le loúnajabei. ³⁹Atúriaia jumútu Lerérun Búngiu láu sarágu goúnigi, ladúga agúraba jumá jadáriruni ibágarí le magúmchaditi tídan, láu sun líra, líburu tugúya adímurejaboun nuágu, ⁴⁰áni májatün jiábin númoun lun jibíjini ibágarí ligía.

⁴¹‘Máluajantina lun janúgünina güriquia weírigu. ⁴²Gáma lúmoun, subúdi numútün, áni subúdi numúti luágu mísiñen lan Búngiu jun. ⁴³Áu, lueígiñe loúbadina Núguchi niábin, áni jugúya, merésibirun jumútna, ánjein núbín ámu láu láni lúngua, ligíaba jerésibira. ⁴⁴¿Ída lubásan jaffñerun nuágu, resíbitünga uweíriguni júmagiñegua, máluajan jumúti uweíriguni le lúmagiñeti Búngiu le ábanrügüti? ⁴⁵Marítaqua jumátia luágu níchuguba lan jidúnrun ligíbugiñe Núguchi, Moisés guánarügüba íchiga jidúnrun, le guánarügü uágubei jíchigei jeménigin. ⁴⁶Ladúga, lun jamúga affñe jumá luágu le laríñagubei Moisés, jaffñeruña jamúga gñe nun, ladúga abúrújati Moisés nibúgürü. ⁴⁷Ánjein maffñen jubéi luágu le labúrújabei, ¿ída lubáti jaffñerun luágu le naríñagubei jun?

Leíagüdün Jesúsu seíngü mílu wügüríña
(Mt. 14.13-21, Mr. 6.30-44, Lc. 9.10-17)

6 ¹Lárigiñe, ába lídin Jesúsu loubáfurugun dúna le Galiléa, le méme gñe dúna le giríbei Tibérias. ²Sarágu jáña güriquia afálarei ladúga jaríjini buri miláguru le ladáagubei, láu lareídaguagüdüniña sánditiña. ³Ábati laweírun Jesúsu luágun ában wúbü, ába lañúurun ñi jáma láni disípulugu. ⁴Yaráfaaliti páscua, le jafédun juríu. ⁵Dan laríjinbei Jesúsu luágu sarágu jáña lan güriquia afálaruti, ába laríñagun lun Felípe.

—¿Jalíabasan wagáñija eígini joun sun güriquia ja?

⁶Laríñagunbalin líra lúnrügü lagáambun cába lan laríñaga Felípe, Jesúsu, subúdi láali cába lan ladúga. ⁷Ábati laríñagun Felípe lun.

—Ni bián-san fiádürü fein louguaboun lun tafánreinjoúniwa murúsun murúsun jádan sun güriquia ja.

⁸Ábati laríñagun Andrés, ában gñe jádaangiñe disípulugu, le lamúlen Simón Pédro, lun.

⁹—Níján ában irájü ya, nújein seíngü fein lúma, jáma bián úduraü, louguabei líra joun sarágu güriquia.

¹⁰Ábati laríñagun Jesúsu.

—Aríñaga jumá joun súngebui lun jañúurun.

Ñíñanuti jawára seíngü mílu wügúriña bougudin jaweí würiña jáma irájüñü. Queíti ñíñein lan sarágu sagádi lídan fulásu ligía, ába jañúurun. ¹¹Ábati lanúgünun Jesúsu fein lújaborugu, lárigiñe líchugun eteíngiruni lun Búngiu, ába líchugunun joun láni disípulugu, ába jafánreinjanun disípulugu jádan sun ja ñúnbaña. Ligía méme ladúga jáu úduratü, ruínaleí sun le jabúseerubei joun.

¹²Dan le quimúleña, ába laríñagun Jesúsu joun láni disípulugu.

—Abúdaja jumeí sun le ígiragubei, mabúlegu lámuga ni cáta.

¹³Ába jabúdajani, ába jabuínchagüdün dúusu faníñe láu tífe fein le ígiragubei tídaangiñe seíngü fein. ¹⁴Dánti le jaríjinbalin gürígia miláguru le, le ladúgubei Jesúsu, ába jaríñagun.

—Inárüni luágu niján lan proféta lé meja lúnbei liábin ubouágun.

¹⁵Queíti lasúbudiruni Jesúsu luágu busén jamá janúgüni láu érei lun jadúgüni urúeime, ába lídin lábugua luágun wúbü.

Leíbugun Jesúsu ligíbuagu dúna

(Mt. 14.22-27, Mr. 6.45-52)

¹⁶Dan le lagúñedunbei, ába jarágachun láni Jesúsu disípulugu lárün dúna, ¹⁷ába jádinagun tídoun ában ugúnein, ába jagúmeserun ánjiñuragua lun jachúlürün Capernaúm. Búrigaaliti, machúlüti Jesúsu jámoun. ¹⁸Ába lagúmeserun garábali áfuragua jére, ába lérougadun. ¹⁹Dan le awáanseña luára seíngü o sísi quilómetros, ligía jaríjin liábin Jesúsu tuágun ugúnein, eíbugeina ligíbuagu dúna, ába janúfudedagun. ²⁰Ába laríñagun joun.

—Manúfueda jumá, áu le.

²¹Ábati jerésibiruni láu ugúndani tídan ugúnein, ába jachúlürün lídoun fulásu le ñíjin lubeí jóúdin lídan murúsun óra.

Jáluajani gürígia Jesúsu

²²Larúgan, ába jaríjin gürígia ja eréderubaña loubáfurugu luágu ñúñünja jamá buga disípulugu tídan ugúnein to ñíboun áni tugúya rügúñoun ñi, áni mídin lan Jesúsu jáma. ²³Súnti dan ligía, ába tiábingua ugúnein ubúrugugiñe Tibérias lun lídoun ában fulásu yaráfa lun le ñí lubei jeígoun fein lárigi leteíngirun Jesúsu tuágu. ²⁴Dánti jaríjini gürígia luágu úa lan Jesúsu ñi, ni láni disípulugu, ába jádinagun tídoun ugúnein buri tugúya, ába jóúdin Capernaúm áluajei.

Jesúsu, fein to lánina ibágari

²⁵Dan le jachúlürünbei loubáfurugu dúna, ába jadáriruni Jesúsu, ába jaríñagun lun.

—Maésturu, ¿ída búgasan biábin?

²⁶Ába laríñagun Jesúsu joun.

—Ninárün jáu luágu ladúga lan jeígin darí lun jaquímuledun jáluajana, máma ladúga gunfaráanda jumáni laníchigu buri miláguru. ²⁷Madíjerida

jumá luágu eíginí le gagúmuchaditi le lúntíbei júgubu, áluaja juméi eíginí tun juwáni, le íchugubei ibágari magúmuchaditi. Ligía eíginí le lúnbei níchuguni jun, áu Wügúri Garaúwarügüti, ladúga rúlaali Búngiu Úguchili ubáfu nun lun níchuguni ibágari ligía.

²⁸Ábati jaríñagun lun.

—¿Ída lubásan wadúga lun woúdin láu le lubeíbei Búngiu?

²⁹Ába laríñagun Jesúsu joun.

—Le labúseerubei Búngiu, lun jafíñerun nuágu, áu le loúnajabei.

³⁰Jaríñagati lun.

—¿Cábagi seíni gayára barúfudun woun lun wafíñerun buágu? ¿Cági cátei badúgübei? ³¹Binádu wagúbürigu jóutiña meja fein to giriboun maná lídan fulásu mageírawati, quei taríñaguni Lerérun Búngiu. “Joúgüda lumútiña Búngiu fein to siélugiñetu.”

³²Ába laríñagun Jesúsu joun.

—Nínárün jáu luágu máma lan Moisés íchugubarun fein siélugiñetu tugúya joun, Núguchi íchugubei fein joun áni ligía gíñe íchugubarun fein siélugiñetu jun to tímatimaatu. ³³Ladúga fein to líchuguboun Búngiu, tugúya to aráriruboun siélugiñe áni rúti gíñe ibágari joun lílana ubou.

³⁴Ábati jaríñagun lun.

—Rúboun fein tugúya woun súnwandan.

³⁵Ába laríñagun Jesúsu joun.

—Áu fein to íchuguboun ibágari. Le ñúbinti númoun, malámadügüyaarume luwáni, le afíñeruti nuágu, mamágürabudügüyaaru gíñe luwáni. ³⁶Quei le nubeíbei jun, jugúya maffíñetün láu sun aríja jumáadina lan. ³⁷Sun gürígia ja líchugubaña Núguchi nun, ñúbintiña nun, játi ñúbintiña númoun mabúgun nubáña. ³⁸Máma niábiña siélugiñe lun nadúgüni nugúndan, le náni núngua, niábiña lun nadúgüni lugúndan le oúnajabalina. ³⁹Léti labúseerubei Núguchi le oúnajabalina, lun meféridirun nan ni ában jádaangiñe ja líchugubaña nun, lun sarágüdarügü nániña lídaangiñe ouweni lídaanme lagúmujoún wéyu. ⁴⁰Le labúseerubei le oúnajabalina, lun sun lan ja anúgütina queísi Liraú Búngiu, afíñe jagía nuágu, lun gabágari jamá le magúmuchaditi, áni násaaragüdübaña lídaangiñe ouweni lídan lagúmujoún wéyu.

⁴¹Ába jagúmeserun juríu adímureja wuríba luágu Jesúsu ladúga laríñagun luágu ligía lan fein to aráriruboun siélugiñe. ⁴²Ába jaríñagun.

—¿Ma funági Jesúsu le liraú José le? Subúdi wamúti lúguchi túma lúguchu. ¿Ída liñáti laríñagunbei luágu siélugiñe lan larárira?

⁴³Ábati laríñagun Jesúsu joun.

—Madímureja jumá nuágu. ⁴⁴Siñáti liábin ni ában númoun ánjein máma lubeí lanúgün Búngiu Úguchili le oúnajabalina, áni násaaragüdübei lídaangiñe ouweni lídan lagúmujoún wéyu. ⁴⁵Laríñajare tídan líburu to jerérun profétagu. “Larúfudajaba Búngiu joun súnugubei.” Sun lubeíti ja agáambubalin Búngiu Úguchili, furéndeí jagía lúmagiñe, ñúbintiña númoun.

46 'Máma jamúgattia luágu njein lan arjiti Búngiu Úguchili. Áu le ñúbinbei lúmagine Búngiu, áu rügüñein arjiei. 47 Ninárün jáu luágu le lan afñeti nuágu, gabágariti le magúmuchaditi. 48 Au fein to íchuguboun ibágarí. 49 Joutiña binádu jagúbürigu fein to maná lídan fulásu mageírawati áni láu sun luwúyeri jiláguatiña. 50 Áu, tuágu fein to aráriruboun siéluigiñe nadímureja, lun ja lan eígitu, lúmounbaña Búngiu. 51 Áu méme fein winwantu tugúya to aráriruboun siéluigiñe, le eígiti tídaangiñe fein tugúya, labágariduba le tímatimaati lúma Búngiu lun súnwandan. Fein to lúnboun níchugunun, nógubu guánarü, níchugubei lun gayáraabei lan jabágaridun gürigia lun sun dan lúma Búngiu.

52 Ábati jeréderun juríu adímureja jámagua, ába jaríñagun.

—¿Ída lubásan leíggüdüni le lúgubu guánarü woun?

53 Laríñaga Jesúsu joun.

—Ninárün jáu luágu ánjaün lan meígin lídaangiñe nógubu, áu Wügúri Garaúwarügüti, mátun jumeíme níta, mabágaribadün. 54 Le eígiti nógubu, gurálei níta, gabágariti tímatimaati le magúmuchaditi, áni násaaragüdübei lídaangiñe ouweni lídan lagúmujóun wéyu. 55 Ladúga eígini le tímatimaati nógubu, unñein le tímatimaati níta. 56 Le eígiti nógubu, gurálei níta, lídañein ában núma, áu lúma. 57 Úguchili le ouñajabalina, gabágariti, áni áu, gabágaritina giñe lídaangiñe, ítara méme líña, le awínwanduti nídaangiñe, gabágaribei nídaangiñe. 58 Tuágu fein to aráriruboun siéluigiñe nadímureja. Mítaraantu fein to quei maná le jeígubei binádu jagúbürigu, láu lan sun luwúyeri jiláguatiña, le eígiti tídaangiñe fein to, labágariduba tímatimaati lun sun dan lúma Búngiu.

59 Lídan adámuridaguni tídan jalígilisin juríu to Capernaúboun, ñi larúfudajei Jesúsu cátei le.

Dimúrei lánina ibágarí magúmuchaditi

60 Sarágu jáña jádaangiñe ja afálarubalin Jesúsu, dan le jagáambunbalin arúfudajani le, ába jaríñagun.

—Cátei le laríñagubei, jénreenguti lerésibirúniwa, ¿cábasan adúga gásu láu?

61 Ába lasúbudiruni Jesúsu luágu jadímurejaña lan luágu cátei ligía, ába laríñagun joun.

—¿Wuríbati láburujan líra jun? 62 ¿Cába jamúga funáti asúsereda ánjana jamúga jaríja, áu Wügúri Garaúwarügüti, awárira nárigoún siélun lé meja ñí nubei furúmiñe? 63 Náni Espíritu, ligía íchugubei ibágarí tímatimaati, nóguburügü, siñáti líderagunün. Áni sún buri cátei le naríñagubei jun, máma luáguti eígini le lúnti jurágeirugu, luáguti eígini le túnti juwáni, le íchugubei ibágarí magúmuchaditi. 64 Áni añájeingua jídaangiñe, mafñetiña.

Ladúga lúmagine furúmiñeti dan, subúdi láña Jesúsu cátaña lan mafíñebaña, lúma cátei lan le lúnbei lalúguruni. 65 Ába laríñagun.

—Ligía naríñagunbei jun luágu siñá lan liábin ni ában nómoun ánjein máma lubei Nóguchi Búngiu agúarubei lun.

⁶⁶Lúmagine dan ligía, sarágu jáña jádaangiñe ja afálarubalin Jesúsu, ába jígiruni, ába meíbugunjaña lan lúma. ⁶⁷Ábati laríñagun Jesúsu joun dúusu disípulugu.

—Ángi jugúya, ¿buséntün gñe jídin nuei?

⁶⁸Ába loúnabun Simón.

—¿Cábagi úmoun woúdin? Dimúrei buri le baríñagubei, lánina ibágarí tímátimaati le magúmuchaditi. ⁶⁹Wagía afíñeediwa, áni subúdi wamúti luágu amúrú lan Crístubei le Liraú Búngiu wínwanti.

⁷⁰Ába laríñagun Jesúsu joun.

—¿Másan áu anúadajabalün dúusugubei jugúya? Láu sun líra, níjein ában jídaangiñe láni Máfia.

⁷¹Dan laríñagunbalin Jesúsu líra, luáguñein Júdas, le liraú Simón Iscarióte, ladúga ligíaba lan alúgurei, láu sun ában lan jádaangiñe dúusu disípulugu ligía.

Mafíneruntiña lamúlenu Jesúsu luágu

7 ¹Lárigiñe sun cátei le, ába eíbugañaja lan Jesúsu loúbawagu Galiléa, mabúseerunti leréderun Judéa ladúga ñi buséntiña juríu jáfaruni jílagubei. ²Queíti yaráfaali lan ában lídaangiñe jafédun juríu le gíríbeí tufédun dibásein, ³ába jaríñagun lamúlenu lun.

—Meréderabá ya, beíba Judéoun aríja jamámugei gñe bánigu ja níbaña cátei lé buri badúgübeí. ⁴Dan le busén lan ában gürígia lasúbudirúniwa, madúgiün lumúti buri cátei arámudaguarügü. Queíti adúga ban cátei líbeina le, adúgabeí ligíbugiñe sun ubou.

⁵Ni íbini lamúlenu mafíñetiña luágu. ⁶Ábati laríñagun Jesúsu joun.

—Machúlügili dan lun nídin Jerusalén luágu fédu ligía, ánjein jun, buíti furúmierügü óra. ⁷Siñáti jíyereegudún joun ja lánina ubou le, anáti áu, iyéreegutina joun, ladúga geféentina luágu wuríba lán buri cátei le jadúgübeí. ⁸Jeíba lídan fédu, áu mídinbadina guetó, machúlügili nidáani lun nídin.

⁹Lárigiñe laríñaguni sun le joun, ába leréderun Galiléa.

Jesúsu lídan fédu le tánina dibásein

¹⁰Lárigiñe jóudin lamúlenu, ligía lídin Jesúsu lídan fédu ligía, mafúnraangunrügü líña, camá jamuga mabúseerunti larijóuniwa. ¹¹Ítara líña jáluajani juríu lídan fédu ligía, ába jaríñagun.

—¿Jageí funásan wügúri le?

¹²Sarágu jañáti adímurejatiña luágu jádan gürígia. Níñanu aríñagutiña luágu ában lan wügúri buíti ligía, jíbiri aríñaga. “Mabuídunti, yéegua lumútiña gürígia.”

¹³Úati ni ában adímurejati furáangu luágu, ladúga janúfude jaweí juríu.

¹⁴Lamídounjali fédu lúmagua, ligía lebélorun Jesúsu témpulurugun, ába lagúmeserun arúfudaja. ¹⁵Ába laweíridun janígi juríu, ába jaríñagun.

—¿Ída líñasan lasúbudirunbei le sarágu cátei, matúriaajaanga ligía?

¹⁶Ába laríñagun Jesúsu joun.

—Le narúfudajabei, máma nídaangiñeti, lídaangiñeti le oúnajabalina. ¹⁷Ánjein níjein lubeí ában le aránsenti lun ladúgüni le labúseerubei Búngiu, lasúbudirubei ánjein lúmagiñeti lubeí Búngiu le narúfudajabei lúmoun luágu lan náni núngua nadímureja. ¹⁸Le adímurejabei luágu láni lúngua, ladúgüni lun janúgüni gürígia weíri, le oúchubei lun lanúgüniwa le oúnajabalin weíri, ligía aríñagubalin inárüni, áni máma ligía biángua tigíbu.

¹⁹¿Ma inárüni luágu rúlaani Moisés lúruđu jun? Láu sun líra, úati ni ában jídaangiñe úaraduti lúma lúruđu ligía. ¿Ca uágu jabúseera jáfarunina jilágubei?

²⁰Ába jaríñagun lun.

—Níjein espíritu wuríbati bídan, ¿ca busénbei láfarunibu jilágubei?

²¹Ába laríñagun Jesúsu joun.

—Luágurügü ában cátei le nadúgübei lídan wéyu le eméraguagülei laweírida janígi sun jugúya. ²²Arúfudaja lumúti Moisés luáguti jagáburi jurú le circuncisión, (láu sun máma lan ligía agúmeserubalin igáburi ligía, jagúmeserun bináđu lagúbürigu lubáragiñe), ligía lébubei lerésibirun ában irájü circuncisión íbini lídan lan wéyu le eméraguagülei. ²³Ánjein adúga jubálin líra íbini lídan lan wéyu le eméraguagülei luefrügü jadúraaguni lilúrudun Moisés, ¿cáti uágu jagáñida núma lueígiñe nareídaguagüdüni lúgubu ában wügüri dayárugubei lídan wéyu le eméraguagülei? ²⁴Masáminara jumá luágu cátei quéisi laríjüniwa, samína jumá luágu quéisi lubeí.

Ladímurejan Jesúsu luágu ladúgawagún

²⁵Ábati jagúmeserun jádaangiñe ja aganoúbaña Jerusalén álügüdjaja.

—¿Másan niján le jáluajabei lun jáfaruni jilágubei? ²⁶Nijánga adímureja ligíbugiñe guríriguaü, áni úati ni ában aríñaguti ni cáta lun. ¿Léfunasan affiñe jamá gumádimatiña luágu wügüri lan le Crístubei? ²⁷Subúditi woun jalíagiñe lan liábin le, ánjeinti dánme le liábin Crístu, ibídiñebei ni ca un jalíagiñe lan liábin.

²⁸Dan lagáambubalin Jesúsu cátei le, dan larúfudajaña lubeí témpulurugu, ába laríñagun rein.

—¡Subúdi jumútina lubeíti, subúdi jumeí jalíagiñe lan niábin! Máma láu náni núngua niábin, ában le inárünibeí luágu níjein lan, ligía oúnajabalina, áni ibídiñeti jun. ²⁹Áu, subúdi numúti ladúga lúmagiñe lan niábin, áni ligía oúnajabalina.

³⁰Ába yebéti jabúseerun jadáürüni, úati ni ában agúuruti luágu ladúga machúlügili lan dan lun lóunwen. ³¹Sarágu jáña affínerutiña luágu, ába jaríñagun.

—Dánme le liábin Crístu, ¿ladúgüba funági ámu miláguru sügú láu wügüri le?

Jóunajan fariséogu polisía adáürei Jesúsu

³²Ába jagáambuni fariséogu le jaríñagubei gürígia luágu Jesúsu, jagía jáma jábutigu fádorigu, ába jóunajan polisía témpulurugugiñe lun jadáürüni. ³³Ábati laríñagun Jesúsu.

—Murúsunrügübei dan neréderun júma ya, ábame nagíribudun lúmoun le oúnajabalina. ³⁴Jáluajabadina, madári jubádina, ladúga siñábei lan jidin le ñíjinbadina lubeí.

³⁵Ábati jagúmeserun juríu álügüdagua jámagua.

—¿Jalíñounba funásan lídin le siñábei lubeí nege wadáriruni? ¿Lefbuga funa jámoun juríu ja jagánaguabaña gürígia ja güríegu, lun larúfudajan joun güríegu? ³⁶¿Ca míni lan láu laríñagun woun. “Jáluajabadina, madári jubádina ladúga siñábei lan jidin le ñíbadina lubeí?”

Líseesen dúna wínwanti

³⁷Le lagúmujóun wéyu lídan fédu ligía, ligíatima weírigubei. Lídaanti wéyu ligía, ába laráramun Jesúsu, ába laríñagun láu umálali reínti.

—Le mágürabutu luwáni, ñúbinlá nómoun, gurála. ³⁸Le afíñeti nuágu, láwiyujaba dúna wínwanti tídaangiñe lanígi, quei taríñaguni Lerérun Búngiu.

³⁹Laríñaguña Jesúsu láu líra luágu ja lan afíñerutiña luágu, jerésibirubei lan Sífiri Sándu, dan ligía, miábingili Sífiri Sándu ladúga magíribudungili lan Jesúsu larigoún siélun lídoun luweírigun.

Fánreinguauü jádan gürígia

⁴⁰Ñíñanu jádaangiñe gürígia, dan le jagáambunbalin cátei le, ába jaríñagun.

—Inárüni luágu niján lan proféta lé meja lúnbei liábin.

⁴¹Jaríñaga jíbiri.

—Niján Crístubei.

Jaríñaga jíbiri.

—¿Ída lubásan Galiléanabei lan Crístu? ⁴²Taríñajare Lerérun Búngiu luágu ladúgawagunbei lan urúei Davíd Crístu, áni Beléngiñetibeí lan, fulásu meme le ñígiñeti lubeí Davíd.

⁴³Ába lubeíti jafánreinragun gürígia lueígiñe Jesúsu. ⁴⁴Ñíñanu yebe abúseerutiña jadáürüni, úati ni ában adúgüti.

Mafíñetiña gumádimatiña luágu Jesúsu

⁴⁵Ába jagíribudun polisía ja tánina témpulu jarigoún jámoun fariséogu jáma jábutigu fádirigu. Ába jaríñagun joun polisía.

—¿Ca uágu manúgün jubálin?

⁴⁶Ába jaríñagun polisía.

—¿Úagili ni ában adímurejati quei ladímurejan wügúri le!

⁴⁷Ábati jaríñagun fariséogu joun.

—¿Ígiraguagüdaadün gíñe júngua lun leyéedunün? ⁴⁸¿Níjein funági ában jádaangiñe wábutigu o jádaangiñe lan fariséogu afíñeruti luágu? ⁴⁹Ánjaña gürígia ja, ja afálarubalin wügúri ligía, ja ibídiñejabubaña lun lúruđu, íñarawagúaaña.

⁵⁰Nicodémo, le ñúdüñbei adímureja lúma Jesúsu gúñoun, ligía ában jádaangiñe fariséogu, ába laríñagun joun.

⁵¹—Según walúrudun, siñáti wasíadiruni ában wügúri magáambunga wameí furúmiñe lun wasúbudiruni ca lan lidúnrunbei.

⁵²Ábati jaríñagun lun.

—¿Galiléana giñe amúri, badímurejaanbei luágu lufúleisein? Atúrijaboún Lerérun Búngiu, basúbudirubei luágu úagili lan ni ában proféta Galiléana.

⁵³Ába jóudin cáda ában jábiñoun.

Wúri maréitu to aganoúboun luma ámu wügúri

8 ¹Ánjeinti Jesúsu, ába lídin luágun wúbü le gíribei Olívos. ²Larúgan bináafin, ába lagíribudun témpulurugun, ába jayábin sun gürigia lubádun, ába lañúurun, ába lagúmeserun arúfudaja joun. ³Ábati janúgün arúfudajatiña lilúrudun Moisés jáma fariséogu ában wúri jadáriragun lúma ámu wügúri lueí túmari. Ába jíchugunun jamídaangua ja ñíbaña jámagua, ⁴ába jaríñagun lun Jesúsu.

—Maésturu, nuján wúri to, wadáriragun lúma ámu wügúri lueí túmari.

⁵Laríñajare lilúrudun Moisés jawágu jíbe wúriña ja, lun jáfarawagún jilágubei láu dúbü. ¿Cági baríñagubei?

⁶Jaríñagunbalin líra lun jaríjin lábun, lun gébuna lan jíchugun lidúnrun. Ábati lélemuchun Jesúsu, ába labúrújan múarugu láu lújabu.

⁷Queíti jasígirun álügüdaguei, ába laráramun, ába laríñagun joun.

—Furúmiñeguarügü jádaangiñe le mafígouti, chúleí furúmiñeti dúbü tuágu.

⁸Ábaya lélemuchun, ába lasígirun abúrija múarugu. ⁹Jagía, le jagáambubalin le laríñagubei, ába jasándiragun jóungua luágu gafígoun jamá, ába jáfuridunga ában ában, jagúmesera jámagiñe ja weínamutimáajañabaña. Dánti le furíjaña súngubei, ába ladáriragun Jesúsu lúngua lábugua túma wúri tugúya quei teréderunbei ñi. ¹⁰Ábati liñúraguni Jesúsu lichúgü, ába laríñagun tun.

—¿Jagáñasán buga ja íchugubaña bidúnrun? ¿Úati ni ában asíadirutibu lun boúnwen?

¹¹Ába taríñagun lun.

—Uá, úati ni ában.

—Ábati laríñagun Jesúsu tun.

—Ni áu, masíadirun nubádibu, beíba, madúgadügüyabá figoú.

Jesúsu lilámpun uboú

¹²Ábaya ladímurejan Jesúsu joun gürigia, ába laríñagun.

—Áu lilámpunbei uboú, le afálarutina, libíjubei larúgounga le anúgübei gürigia lídoun ibágarí magúmuchaditi, áni meíbugunbei lídan lubúriga.

¹³Ábati jaríñagun fariséogu lun.

—Amúri, badímurejaña buíti buoúgua, mebégiti líra.

¹⁴Ába laríñagun Jesúsu joun.

—Le naríñagubei gebégiti, láu sun áu lan adímurejabei buíti nuoúgua. Áu, subúdi numúti jalágiñe lan niábin lúma jalíñounba lan nídin, ánjein jugúya, ibídiñeti jun jalágiñe lan niábin ni jalíñounbadina lan. ¹⁵Jugúya, jasáminarun nuágu queísi luwúyeri lasáminarun uboú, áu, magúseragüdüntina ni ában. ¹⁶Ánjana jamúga agúseragüda, nadúgüñein jamúga láu úarani, ladúga mámarügüba áu agúseragüda, Núguchi le oúnajabalina lagúseragüdüba gíñe núma. ¹⁷Bürúwati lídan jilúrudun luágu dan lan geféen jamá bián güriquia luágu ában méme cátei, lúnti lan lafñerún joun. ¹⁸Ítara liñáti áu ában le geféenbei luágu náni fuleísei, Núguchi le oúnajabalina, ligía gíñe ában le geféenbei nuágu.

¹⁹Ábati jaríñagun lun.

—¿Jageígi Búguchi?

Ába laríñagun joun.

—Jugúya, ibídiñetina jun, ni Núguchi, ibídiñeti gíñe jun, lun jamúga subúdi jumánina, subúdi jamúga gíñe Núguchi jun.

²⁰Lídan laríñagubalin Jesúsu cátei le, larúfudajaña témpulurugu lídan fulásu le ñí tubeí buri gáfu to lágei seínsu. Madáürün lumúti ni ában ladúga machúlügili lan lidáni lun loúnwen.

Laríñajare Jesúsu joun luágu siñá lan jeídin ñíjinba lubeí lídin

²¹Ábaya laríñagun Jesúsu joun.

—Áu, neíbuga, jugúya jáluajabadina, jóüweguba gaffgounga, siñáti jídin le ñíjinba lubeí nídin.

²²Ábati jaríñagun jurú.

—¿Láfaragua funa lúngua, laríñagunbei luágu siñá lan woúdin le ñíjinba lubeí lídin?

²³Ábati laríñagun Jesúsu joun.

—Jugúya, únabuna jugúya, ánjein áu, yágütana íñu áu. Láni uboú le jugúya, ánjein áu, máma láni uboú le áu. ²⁴Ligía naríñagunbei jun luágu jóüweguba lan gaffgounga, ladúga ánjein maffíñen jubeí luágu áu lan áu, jóüweguba ítara.

²⁵Ábati jaríñagun lun.

—¿Cátabuti?

Ába laríñagun joun.

—Aríñaga náali jun lúmagiñe binárü. ²⁶Gayáraati jamúga naríñagun gíbeti jun luágu luríban jigáburi lun nadeínjan jun, le oúnajabalina aríñaga lumúti inárüni, áni cáteirügübei le nagáambubei lúmagiñe le oúnajabalina naríñaga joun ja lílana uboú.

²⁷Ánjein jagía, úati gunfaráanda jamáni láu luágu lan Búngiu ladímureja Jesúsu joun. ²⁸Ligía laríñagunbei joun.

—Dánme le jiñúrunina, áu Wügúri Garaúwarügüti, ligíame jasúbudiruni luágu áu lan le uágubei naríñaga luágu áu lan, áni madúgün nan ni cáta luágu náni nungua, lueídügüya le larúfudajabei Núguchi nun.

²⁹Ladúga númañein le oúnajabalina, mígirun lágidina Núguchi nábugua, ladúga adúga nání le áubei lagúndaara súnwandan.

³⁰Dan le laríñagunbalin Jesúsu le, ába jafíñerun sarágu luágu.

Lirájüñü Búngiu jáma lidámuniña figou

³¹Ába laríñagun Jesúsu joun juríu ja áñarubaña lun lerérun.

—Ánjaün asígira lun jídin surúñu láu le nubefbei jun, jiábinba lun nání jumá disípulugu le tímatimaati. ³²Ábame jasúbudiruni inárüni, ábame lafúnraanguagüdünün inárüni.

³³Ába jaríñagun lun.

—Linébaanfaangu Abrahám wagía, áni merédegidiwa idámunime ni ca un. ¿Ída liñáti baríñagunbei luágu furáangujadiwa lánme?

³⁴Ába laríñagun Jesúsu joun.

—Ninárün jáu, luágu sun lan ja adáagubaña figou, lidámun figou jagía.

³⁵Ában idámuni, máma jádaangiñeti família, ánjeinti ában isáani, jádaangiñeti família súnwandan. ³⁶Ánjaün lubefti nafúnraanguagüda, áu le Búngiu Iráji, lídaangiñe idámuni lun figou, furáangubadün le tímatimaati. ³⁷Subúdi náali luágu linébaanfaangu jumá Abrahám, láu sun líra, buséntün jáfarunina, ladúga mája jumá lun le nubefbei jun. ³⁸Áu nadímurejan luágu le larífudubei Núguchi nun, jugúya jadúgüni le jafúnrendeirubei lúmagiñe júguchi, le Máfia.

³⁹Ába jaríñagun lun.

—Abrahám wáguchibeí.

Ába laríñagun Jesúsu joun.

—Lun jamúga inárüni lan luágu lirájüñü jumá Abrahám, jadúgüñein jamúga le ladúgübei. ⁴⁰Láu sun aríñaga náali lan inárüni le larífudajabei Búngiu nun jun, buséntün jáfarunina. ¡Madúgünti meja Abrahám ni cáta líbe líra! ⁴¹Le méme ladúgübei júguchi, ligía jadúgübei.

Ábati jaríñagun lun.

—Mámatia wagía bástadi, ában rügüñein wáguchi, Búngiu.

⁴²Ába laríñagun Jesúsu joun.

—Ánjein jamúga Búngiu lubeí júguchibeí, jínsiñetina jamúga jun ladúga lúmagiñe Búngiu niábin, áni anája ya. Máma láu nání nungua niábin, Búngiu oúnajabalina. ⁴³¿Ca uágu lásiñerunbei gunfaráanda jumáni le naríñagubeí? Ladúga mabúseerun jumá jagáambuni nání ugánu. ⁴⁴Máfia júguchibeí, lánigu jugúya, áni buséntün jadúgüni lugúndan. Gáfarajadigubeiñein Máfia lúmagiñe furúmiñeti dan. Márügüdünti luegiñe inárüni, maríñagunti giñe inárüni. Lídan le laríñagun iyéeni, ladímurejaña quei ligáburí, ladúga yéeti áni ligía lúguchibeí iyéeni. ⁴⁵Ánjeinti áu, quei inárüni lubeí naríñagubeí, mafíñetün nun. ⁴⁶¿Ca jídaangiñe gayáraabei larífuduni luágu gafígoun nan? Ánjeinti inárüni lubeí naríñagubeí, ¿cáti uágu mafíñen jubeí nun? ⁴⁷Le lánigu Búngiu, agáamba lumúti lerérun Búngiu, ánjeinti jugúya, quei máma jubeí lánigu Búngiu, ligía mája jubeí jagáambuni.

Níjeinjali meja Crístu lubáragiñe Abrahám

⁴⁸Ábati jaríñagun juríu lun.

—Wanárün láu waríñagun luágu máma ban ámu jawei jagúbüri Samariána, luágu gíñe níjein lan ában espíritu wuríbati bídan.

⁴⁹Ába laríñagun Jesúsu joun.

—Úati espíritu wuríbati nídan. Le nadúgübei, níchuguña inébesi lun Núguchi, jugúya, íchiga minébeni nun. ⁵⁰Málujaantina inébesi núngua, láu sun níjein lan ában áluga lumúti ninébesi, áni ligía le agúseragüdübei. ⁵¹Ninárün jáu luágu le lan adúgüti gásu láu le nubefbei, moúnwenbei lan.

⁵²Ábati jaríñagun juríu lun.

—Anáti guetó, choúru wamáali luágu níjein lan espíritu wuríbati bídan. Jiláti Abrahám, jilágu profétagu, áni aríñagagibu luágu le lan adúgüti gásu láu le bubei, moúnwenbei lan. ⁵³¿Cátabuñadíbugi lúmoun wáguchi Abrahám? Jiláti Abrahám, jilágu profétagu. ¿Ída liñáti banáangun búngua?

⁵⁴Ába laríñagun Jesúsu joun.

—Ánjana íchiga uweíriguni nuógu, málabei, ánjeinti Núguchi, le méme uágubei jaríñaga luágu ligía lan Jubúngiutebei, ligía íchugubei uweíriguni nuágu. ⁵⁵Jugúya, ibídíñeti Búngiu jun, anáti áu, subúditi nun, áni ánjana jamúga aríñaga luágu ibídíñe lan nun, yéetina jamúga gíñe quei jugúya. Subúditi Búngiu nun le tímatimaati, áni adúga numúti le lubei. ⁵⁶Abrahám lé meja binádu júguchi, gúndaati meja láu lasúbudiruni luágu lachúllürüba lan nuwéyuri lun niábin uboúagun queísi asálbaragülei, buin líña láu ugúndani dan laríjini wéyu ligía.

⁵⁷Ábati jaríñagun juríu lun Jesúsu.

—Úagubeigili ni dimí-san irúmu báu, ¿aríñagatibu luágu aríja báni Abrahám?

⁵⁸Ába laríñagun Jesúsu joun.

—Ninárün jáu luágu lubáragiñe lan ñi lan Abrahám, anájeinjadina.

⁵⁹Ába jabúdajan dúbü lun jachúraguni luágu, ába larámudagun, ába láfuridun témpulurugugiñe, ába lásügürün jamídaangiñe, ába lídin.

Lareidaguagüdün Jesúsu ában wügüri maríjinti

9 ¹Lídan le lásügürün Jesúsu lídaangiñe ában fulásu, ába laríjin ában wügüri maríjinti kúmagiñe lagúriajoún. ²Ába jaríñagun láni dispulugu lun.

—Maésturu, ¿cásan uágu lagúriajoúnbei wügüri le maríjinga? ¿Ladúgasan jafígoun lagúbürigu, o ladúga lifígoun guánarü?

³Ába laríñagun Jesúsu joun.

—Máma ladúga lifígoun, máma gíñe ladúga jafígoun lagúbürigu, lasúseredunbei ítara lun larijóuniwa le luáraabei Búngiu adúga láu lareidagun wügüri ligía. ⁴Lúnti nadúgüni luwádigimari Búngiu le oúnajabalina sun wínwangidina lan, jiláadina ligíame, siñáme nadúgüni. ⁵Sun dan anája lan ligíbuagu uboú le, áu lilámpunbei uboú.

⁶Lárigiñe laríñaguni Jesúsu cátei le, ába lásuerun múarugun, ába ladúgün murúsun gubégubeti láu larúre, ába lájuruduni luágu lágu le maríjinbei. ⁷Ába laríñagun lun.

—Beíba achíbeí bigíbu lídan dúna le gíríbeí Siloé —míni lan líra, Oúnajoúti.

Ába lídin maríjinti ligía, ába lachíbuni ligíbu ñi, dan le lagíríbudunbei, aríjaali. ⁸Játi lubésinanigu jáma gürígia já meja aríjubalin amúriaaja, ába jaríñagun.

—¿Másan nijáñaja le añúurubeí amúriaaja seínsu?

⁹Ñíñanu aríñagutiña.

—Ánja, ligía.

Jaríñaga jíbiri.

—Máma ligía, lenége.

Ába laríñagun wügúri ligía.

—Ánja, áu.

¹⁰Ábati jaríñagun lun.

—¿Ída liñáti aríjaadibu lubeí?

¹¹Ába laríñagun joun.

—Wügúri le gíríbeí Jesúsu, ligía adúgübeí murúsun gubégubeti, ába lájuruduni luágu nágu, ába laríñagun nun. “Beíba lídan dúna le gíríbeí Siloé, ábame bachíbuni bigíbu ñi.” Ábati nídin, lásun nachíbuni nigíbu, ába naríjin.

¹²Ábati jaríñagun lun.

—¿Jageígi wügúri ligía?

Laríñaga joun.

—Ibídiñeti nun jageí lan.

Jálügüdaguni fariséogu maríjinti le areídaguagüdúwalíbeí

¹³Ábati janügüni wügúri lé meja maríjinbei jagíbugiñoún fariséogu.

¹⁴Queíti lídan lan wéyu le eméraguagülei ladúgei Jesúsu gubégubeti le áubei lareídaguagüdei maríjinti ligía, ¹⁵ába gíne jálügüdüni fariséogu wügúri ligía ída líña lan gayáraajali lubeí laríjin. Ába laríñagun joun.

—Ába líchugun gubégubeti luágu nágu, ába nachíbuni nigíbu, guetó aríjaadina.

¹⁶Ábati jaríñagun jádaangiñe fariséogu.

—Le wügúri le adúgübalin cátei le, siñáti loúnagüle lan Búngiu ladúga minébenti wéyu le eméraguagülei lun.

Jaríñagati jíbiri.

—¿Ída liñáti ladáaguni buri miláguru le, ánjein gaffigoun lubeí?

Ába lubeíti ñi lan fánreinguauí jádan. ¹⁷Ábaya jálügüdüni lé meja maríjinbei.

—Ángi bugúya, ¿cági baríñagubeí luágu wügúri le, queísi bugúya lubeí le laríjagüdübeí?

Ába laríñagun.

—Nugúya, naríñagun luágu ában lan proféta.

¹⁸Májatiña yebe fariséogu jafíñerun luágu maríjin lán meja wügúri ligía áni aríjaali lan guetó, darí lun jagúarun joun lagúbürigu, ¹⁹ába jaríñagun joun.

—¿Nijánsan jiraú le uágubei jaríñaga luágu maríjin gubeíñein lan lúmagiñe lagúriajóun? ¿Ída liñáti aríjaali lubeí guetó?

²⁰Ába jaríñagun lagúbürigu.

—Subúdi wamúti luágu waraú lan le, áni maríjin lan dan le lagúriajóunbei, ²¹ibídiñeti woun ída líña lan aríjaali lubeí, ni ca lan areídaguagüdúbalin lágu. Álügüda jumeí, weíriyaali, gayáraati loúnabun lueígiñegua.

²²Anúfudeiti aríñagagüdúbalin líra joun lagúbürigu wügúri ligía, ladúga aríñagaña lan fariséogu luágu sun lan ja afíñerutiña luágu Jesúsú lan Crístubei, jabugúba lan tídaangiñe jalígílisin juríu. ²³Ligía jaríñagunbei lagúbürigu. “Álügüda jumeí, weíriyaali.”

²⁴Ábayati jagúarun juríu lun wügúri lé meja maríjinbei, ába jaríñagun lun.

—Aríñagabeí inárüni woun ligíbugiñe Búngiu, wagía, subúditi woun luágu gafígoun lan wügúri líra.

²⁵Ábati laríñagun joun.

—Ibídiñeti nun ánjein gafígoun lubeí lúmoun mafígoun lan. Le nasúbudirubei, luágu maríjin nán meja, áni guetó aríjaadina.

²⁶Ábaya jaríñagun lun.

—¿Cásan ladúgübei báu? ¿Ída liñásan ladúga lun laríjagüdünibu?

²⁷Ába laríñagun joun.

—Aríñaga náali jun, mebéreseguntün náu, ¿cáti uágu jabúseera naríñaguniya jun? ¿Ódi buséntün giñe jafálaruni?

²⁸Ábati janábuni, ába jaríñagun lun.

—Bugúya, falá bumuti larúfudajan wügúri ligía, ánjein wagía, larúfudajan Moisés wafálarubei. ²⁹Subúditi woun luágu adímureja lán meja Búngiu lun Moisés, ánjein le, ibídiñegubeíti woun jalíagiñeti lan.

³⁰Ábati laríñagun wügúri ligía joun.

—¿Ámuti giñe cátei le! ¡Ibídiñeti jun jalíagiñeti lan, áni aríjagüda lána! ³¹Subúditi woun luágu magáambun lániña Búngiu gafígountiña, ja rügúñanu ájuduragubaña lun jáma ja adúgúbalin lugúndan, lagáamba. ³²Magáambuñajagili luágu ni ában aríjagüdúti ában gürígia le agúriajóuti maríjinga. ³³Lun jamúga máma lan lúmagiñe Búngiu liábin wügúri le, siñáti jamúga ladúgün ni cáta.

³⁴Ábati jaríñagun lun.

—¿Bugúyasan le agúriajóubei buin láu figoú, buséntibu barúfudajan woun?

Ába jabúguni tídaangiñe jalígílisin.

Ja maríjinbaña luágu cátei lánina Búngiu

³⁵Ába lagáambuni Jesúsu luágu bugá jamaani maríjinti meja ligía, dánti le ladúnragun lúma, ába laríñagun lun.

—¿Affñetibu luágu Liraú Búngiu?

³⁶Ába laríñagun wügúri ligía lun.

—Aríñagabei nun cátei lan, affñe námuga luágu.

³⁷Ába laríñagun Jesúsu lun.

—Aríja báali, áu le úmabei badímureja.

³⁸Ába lájuduragun ligíbugiñe Jesúsu, ába laríñagun.

—Affñetina, Nabúreme.

³⁹Ába laríñagun Jesúsu.

—Niábinbei ñájoun uboúagun lun néfegechagúdüni jágu ja ibídiñejabubaña lun cátei lánina Búngiu, lun gíñe narúfuduni luágu ja lan aríñagubaña luágu fegé lan jágu luágu buri cátei lánina Búngiu, maríjin jamá ni cáta.

⁴⁰Dan le jagáambunbalin jádaangiñe fariséogu ja ñíbaña cátei le, ába jaríñagun lun.

—¿Baríñaguñati luágu darúñu líña lan gíñe wágu lun cátei le luáguti Búngiu?

⁴¹Laríñaga Jesúsu joun.

—Lun jamúga ibídiñe lan cátei lánina Búngiu jun, madúnruntün jamúga luágu jifígoun, quei jaríñagun luágu subúdi jumáni, gadúnruntün.

Jémpulu luáguti louñigiruniña Jesúsu lánigu queísi ában ouñigiruti mudún

10 ¹Ninárün jáu luágu le lan mebéluti lídaangiñe lubéneri jabárierun mudún, lun lebélorun lídaangiñe ámu oúbaü, jíweruti. ²Ánjeinti le ebélurubei lídaangiñe béna, ligía le ouñigirubaliña mudún. ³Ába lánjunrenchuni le ouñigirubalin béna béna lun, lun lebélorun, subúdi jamúti gíñe mudún lumálali. Ába lagúajan joun láu jíri, ába laságaraguniña baríerurugugiñe. ⁴Lárigiñe laságaraguniña súngebui, ába lídin éfbugeina jabá jabá, ába jafálaruni ladúga subúdi jamáni lumálali. ⁵Mídintiña lárigi ában le ibídiñeti joun, anúrararügütiña lueí ladúga ibídiñeti jamálali ámu mútu joun.

⁶Rúlumuti Jesúsu jémpulu le joun, úati gunfaráanda jamáni le labúseerubei laríñagun joun.

Jesúsu jouniri mudún buíti

⁷Ábayati laríñagun Jesúsu joun.

—Ninárün jáu, áu béna le ñgiñe lubeí gayára lan jayábin güriquia lun lánigu jamá Búngiu. ⁸Ja ñúbinbaña nubáragiñe, ítara jáña queísi jíwerutiña mudún ladúga iyéeni lan jarúfudajabei, madúgütiña lánigu Búngiu gásu

jáu. ⁹Áu bénabei, le ebéluruti nueígiñe, lasálbarúaba. Ítara lúba quei ában mudún le ebéluruti furí ligía barierurugugiñe, darí ligía sagádi lun leígin.

¹⁰Jíweruti, liábin rügúña lun líwerujan, lun láfarajan lúma lun lagúnrinchagun, ánjein áu, niábiña lun jibjín ibágari, áni lun jibjini gíbe. ¹¹Áu, ítara níña queisi ában joúniri mudún le buíti, le gayáraati líchuguni libágari jawágu lilúgüniña mudún. ¹²Ánjein le ñadágimeinrügüti luágu fáyeiti, dan le larjín liábin anímaalu le jabísa mudún, ába lígiruniña mudún, ába leíbaagun, ladúga máma lan oúnigiruti buíti ligía, máma gíñe lilúgüniña mudún. Ábati liábin jabísa mudún, ába lawáratüdagugüdüniña. ¹³Wügúri ligía eíbaaguati ladúga luwádigimariña lan luágurügü fáyeiti, mebéresegüti jáu mudún.

¹⁴⁻¹⁵Áu oúnigirutibei buíti. Ítara quei nisúbudin lun Núguchi áni subúdi Núguchi nun, ítara líña gíñe jasúbudin nánigu nun, subúdi jamána gíñe queisi subúdi jamáni mudún joúniri. Rúnnumuti nibágari jawágu queisi líchuguni oúnigiruti mudún libágari jawágu lilúgüniña mudún. ¹⁶Añájein gíñe ámu gürígia ja lúnbaña nánigu jamá ja mámabaña juríu, lúnti gíñe nanügüniña lun nánigu jamá. Jagáambubadina, ábame jeréderun súngubei lídan ában lúma ában oúnigiruti.

¹⁷Jínsiñetina lun Núguchi, ladúga níchugubei nibágari luágu uboú, ligía ábayame nibjini. ¹⁸Magída lubef ni ában gürígia nibágari, láuba nugúndan níchigei. Garíchatina lun níchuguni lúma lúnya nerésibiruni. Ligía cátei le laríñagubei Núguchi nun.

¹⁹Dan le jagáambubalin juríu dimúrei buri le, ábaya jafánreinragun.

²⁰Sarágu jáña jádaangiñe aríñagutiña.

—¿Cásan uágu jadúga gásu láu, níjeingusan espíritu wuríbati lídan áni lúlüjali láu?

²¹Jaríñaga jíbiri.

—Úati ni ában le láuti espíritu wuríbati lun gayára lan ladímurejan ítara. ¿Gayáraati funági larjagüdün espíritu wuríbati marjintiña?

Merésibirun jamáni juríu Jesúsu

²²Dan ligía lidáani luríbouga, ladügúñati fédu le lánina tederegerún témpulu Jerusalén lun Búngiu. ²³Ñíñeinti Jesúsu eíbugañaja témpulurugu luágu corredór le gíribei Láni Salomón corredór. ²⁴Ába jagúriridagun juríu láu, ába jaríñagun lun.

—¿Darísan ídaba bígirawa láu machoúruni? Ánjein amúrü lubef Crístubei, aríñagabeí furáangu.

²⁵Ába laríñagun Jesúsu joun.

—Aríñaga náali, mafíñetün nun. Sún buri cátei le nadáagubei láu lugúmadin Núguchi, arúfuda lumúti furáangu. ²⁶Jugúya, mafíñetün ladúga máma jumá jádaangiñe nilúgüniña mudún quei bugája naríñaguni jun. ²⁷Subúdi jamúti nilúgüniña mudún numálali, subúdi numútiña gíñe, áni falá jamutina. ²⁸Rútina ibágari magúmuchaditi joun áni meféridirubaña,

úabei gíñe agídarutiña nújaburugugiñe. ²⁹Núguchi le weíribei jaweí súngubei, ligía íchugubaliña nun, áni úati ni ában lun lagídaruniña lújaburugugiñe. ³⁰Au lúma Búngiu Úguchili ában méme wagía.

³¹Ábayati jabúdajan juríu dúbü lun jachúraguni luágun. ³²Ába laríñagun Jesúsu joun.

—Gíbeeli cátei buíti nadúga jigíbugiñe láu lubáfu Búngiu, ¿cábagi lídaangiñe uágu jíchaagua dúbü nuágu?

³³Ába jaríñagun juríu lun.

—Míchaagunbadiwa dúbü buágu luágu ni cáta buíti badúga, ladúga anába báali lan Búngiu láu berérun. Wügúri rügúñadibu, áni bíchaaguña búngua quei Búngiu.

³⁴Ábati laríñagun Jesúsu joun.

—Bürúwati lídan jilúrudun luágu aríñaga lan Búngiu. “búngiu buri jugúya”. ³⁵Subúditi woun luágu siñá lan leyéedawagún láu le taríñagubei Lerérun Búngiu, áni aríñagatu líburu tugúya luágu wa lániña Búngiu gürígia ja erésibirubalin lerérun lun jíchuguni joun gürígia, quei búngiugu. ³⁶Ánjeinti anúadaja lubáalina Búngiu, ába loúnajanina ubouágun, ¿ída líñati jaríñagunbei luágu anába nání láu naríñagun luágu Liraú nan Búngiu? ³⁷Ánjein madúgün nan cátei lé buri ladúgübei Núguchi, maffñera jumá nun, ³⁸ánjein nadúga, íbini maffñerun jumá nun, affñe jumá luágu buri cátei le nadúgübei, subúdi jumámugei luágu nñein lan Núguchi nídan, áni anájein lan gíñe lídan Núguchi.

³⁹Ábaya jálugun jadáürüni, ába leséfurun jaweí.

⁴⁰Ábati lagíribudun Jesúsu loubáfurugun dúna Jordán, ába leréderun ñi lídan fulásu le ñí lubeí meja labásteragüdaja Juan. ⁴¹Sarágu jáña gürígia ñúdüntiña aríjei, ába buri jaríñagun.

—Láu sun madúgün lan Juan ni ában miláguru, inárüni sun le laríñagubei luágu wügúri le.

⁴²Ába jaffñerun sarágu gürígia luágu Jesúsu lídan fulásu ligía.

Loúnwen Lázaro

11 ¹Ñíñein ában wügúri sánditi, gíriti Lázaro, lílana fulásu le gíribei Betánia, le tageíra María túma Márta to tíbugaña. ²María tugúya, to lítu Lázaro le sándibei, tugúya to éseruboun ibíñei luágun lugúdi Jesúsu, ába tarágajani láu tídiburi. ³Ábati jóúnajan bián ítunu ja, aríñaga lun Jesúsu.

—Jesúsu, sándiñeintia bumáda.

⁴Dan lagáambunbalin Jesúsu cátei le, ába laríñagun.

—Mámabei ouweni lébeja cátei lídaangiñe sándi le, lúntibei larijñiwa luweírigun Búngiu, lúma gíñe lun larijñiwa luweírigun Liraú Búngiu lídaangiñe sándi ligía.

⁵Láu sun weíri lan jínsiñe Márta, María, lúma Lázaro lun Jesúsu, ⁶dan le jaríñawagúnbei lun luágu sándiñein lan Lázaro, reídeigili bián wéyu lídan fulásu le ñí lubei. ⁷Lárigiñe, ába laríñagun joun láni disípulugu.

—Queímounya Judéa.

⁸Ábati jaríñagun lun.

—Maésturu, málügili lueígiñe jálugun juríu jáfarunibu láu dúbü ñi, ¿busényadibu bídin ñi?

⁹Ába laríñagun Jesúsu joun.

—¿Ma dúusuñein óra lídan ában wéyu? Ánjein lubeíti efbuga ában güriquia wéyuagu, machúgeragúnbei, ladúga laríjubei lan larúgounga le yábei ubouágu, ¹⁰ánjein efbuga áriebe, lachúgeraguba ladúga lubúriga.

¹¹Lárigiñe, ába laríñagun Jesúsu joun.

—Arúmuga wamáda Lázaro, nefbuga agágudajei.

¹²Ábati jaríñagun disípulugu lun.

—Maésturu, ánjein arúmuga lubeí, lareídaguárügü líña.

¹³Míni lánti Jesúsu luágu jilá lan Lázaro, jarítagunti disípulugu luágu luágu lan furúmieguarügü arúmuguni ladímureja. ¹⁴Ábati laríñagun Jesúsu joun, furáangu.

—Jilá Lázaro. ¹⁵Gúndaatina láu úa nan ñi, ladúga buítimaati ítara jun, affñe jumámuga. Queímoun waríjei.

¹⁶Ábati laríñagun Tomás, le únbei jaríñaga Mádou, joun jíbiri disípulugu.

—Queímoun gíñe, jilá wamáuga úara lúma.

Jesúsu ásaaragüdübei lídaangiñe ouweni, ligía íchiga ibágarí

¹⁷Dan le lachúlürünbei Jesúsu, gádürüjali wéyu lueígiñe labunún Lázaro. ¹⁸Lidíse Betánia lueí Jerusalén quei bián quilómetros dimí. ¹⁹Sarágu jáñati jádaangiñe juríu ñúdüntiña Jerusaléngiñe bisídoun Márta túma María lun jíchugun ñurúguau joun luágu loúnwen jamúlen. ²⁰Dan tagáambunbei Márta luágu níteeli lan Jesúsu achúlüreina, ába táfuridun lubároun, ánjoun María, ába teréderun múnada. ²¹Ába taríñagun Márta lun Jesúsu.

—Lun jamúga ya ban, moúnwenti jamúga namúlen, ²²áni subúditi nun luágu líchugubei lan Búngiu sun le bamúriajan lúma bun.

²³Laríñaga Jesúsu tun.

—Labágaridayaba bamúlen.

²⁴Taríñaga Márta lun.

—Ánja, subúditi nun luágu labágaridayaba lan lídaanme jásaarun jiláguaaña lídan lagúmujoún wéyu.

²⁵Ábati laríñagun Jesúsu tun.

—Áu le ásaaragüdübaliña jiláaña, rúneí jabágarí joun lárigoún. Le affñeti nuágu, gayáraati loúnwen, labágaridayaba, ²⁶áni sun le wínwangilibei áni affñeti nuágu, labágariduba gíñe lúma Búngiu súnwandan. ¿Affñetibu?

²⁷Taríñaga lun.

—Ánja, Nabúreme, affñetiña luágu bugúya lan Crístubei le Liraú Búngiu, lé meja lúnbei liábin ubouágun.

Layájun Jesúsu lubádu lumúaja Lázaro

²⁸Lárigiñe taríñaguni Márta le, ába tídin ougoun María, ába taríñagun tun jóinguarügü.

—Níjein Maésturu ya lún nege bídin lun.

²⁹Quei tagáambuni María cátei le, ába tásaarun, ába tídin furése aríjei Jesúsu. ³⁰Mebélugiliti Jesúsu ubúrugun, lídaañein fulásu le ñí lubei tadáirei Márta. ³¹Dan le jaríjinbei juríu ja ñíbaña múnada túma María ámalijoun tásaarun ába táfuridun furésegueina, ába jóudin tárigi, jaríttagun luágu teíbuga lán yebe luágu umúajaü ayájua.

³²Dánti le tachúlürünbei María le ñíjin lubeí Jesúsu, ába tájuduragun ligíbugiñe, ába taríñagun.

—Nabúreme, lun jamúga ya ban, moúnwenti jamúga namúlen.

³³Dan le laríjin Jesúsu tayájun María jáma juríu ja ñúbinbaña túma, ába lírudagun tídan lanígi, ³⁴ába laríñagun joun.

—¿Jalíasan jábunei?

Ába jaríñagun lun.

—Jigábu baríjei.

³⁵Ába layájun Jesúsu. ³⁶Ábati jaríñagun juríu.

—¡Aríja jumá luweírin meja línsiñe lun!

³⁷Ñíñanu jádaangiñe aríñagutiña.

—Niján le aríjagüdúbalin wügúri le maríjinbei, ¿siñáti jamúga funásan ladúgün lun moúnwen lan Lázaro?

Lásaarun Lázaro lídaangiñe ouweni

³⁸Ábaya tírudagun lanígi Jesúsu, ába layárafadun lun umúajaü. Umúajaü ligía ában júyu luágu dúbü, ñíñein ában dúbü lidaúme. ³⁹Ába laríñagun Jesúsu.

—Gidájumei dúbü.

Ába taríñagun Márta lun.

—Mósutia jíngiaali lan ladúga gádürü wéyu lueígiñe loúnwen.

⁴⁰Ába laríñagun Jesúsu tun.

—¿Másan aríñagatina bun luágu ánjabu lan afíñe nuágu, baríjubei lan luweírigun Búngiu?

⁴¹Ábati jagídaruni dúbü, ába laríjin Jesúsu siélun, ába laríñagun.

—Núguchi, teínqui numútibu luágu bagáambunina. ⁴²Subúdi numúti luágu agáamba bánina súnwandan, naríñaguñein líra jawágu gürígia ja, ja yábaña, lun jafíñerun luágu amúrü lan oúnajabalina.

⁴³Lárigiñe laríñaguni cátei le, ába lagúaragun.

—¡Lázaro, furíba ñígiñe!

⁴⁴Ába láfuridun jiláali láu lújabu luma lugúdi gürágu táu gamísa, luma ligíbu táu ában gamísa. Ába laríñagun Jesúsu joun.

—Farára jumeí, ígira jumeí lun lídin.

Elédeguni lun lárügüdúniwa Jesúsu

(Mt. 26.1-5, Mr. 14.1-2, Lc. 22.1-2)

⁴⁵Láu lasúseredun líra, sarágu jádaangiñe jurú ja ñúdünbaña túma María, aríja jameí le ladúgübei Jesúsu, ába jafñerun luágu. ⁴⁶Ñíñanu jádaangiñe, ába jóudin jámoun fariséogu, ába jabájüdaguni le ladúgübei Jesúsu joun. ⁴⁷Ábati jayábin fariséogu jáma jábutigu fádirigu, ába jóundaragun jáma jíñun-ágei agúmadijatiña, ába jaríñagun.

—¿Cábasan wadúga? Ladáaguñatia wügúri le sarágu miláguru.

⁴⁸Ánjeinti wígira ítara, jafñeruba sun gürgia luágu, ábamei jayábin gumádimatiña Rómata, ábame jagúmuchaguagüdünun walígilisin láu sun warásan.

⁴⁹Ñíñein ában jádaangiñe, gíriri Gáifasi, ligía jábutibeí fádirigu lídan irúmu ligía, ába laríñagun joun.

—Íbidiñeti ni cáta jun, ⁵⁰maríjin jumeí luágu buítima lan woun lun loúnwen ábanrügü wügúri jawágu jíbiri, máma lun lagúnrinchawagún sun warásan.

⁵¹Máma láu láni Gáifasi lúngua laríñagei líra, ladúga quei ligía lan fádiri le íñutimaabei lídan irúmu ligía, ába laríñagagüdüni Búngiu lun, luágu louweba lan Jesúsu jawágu jurú, ⁵²áni mámarügü jawágu jurú, lun giñe loúndaruniña sun lirájüñü Búngiu ja díseguabaña jawáriuagua. ⁵³Lúmagiñeti wéyu ligía, ába jagúmeserun agúmadijatiña aráanseja lun jáfaruni Jesúsu jilágubei.

⁵⁴Ligía ába lubeí meíbugunjaali lan Jesúsu furáangu jádan jurú, ába láfuridun Judéagiñe, ába lídin lídoun ában fulásu gíriri Efraín, yaráfa lun fulásu mageírawati. Ába leréderun ñi jáma láni disípulugu.

⁵⁵Yaráfaaliti jafédun jurú le gíribeí páscua, sarágu jána gürgia ñúdün Jerusalén lun jadúgiñi igáburi le lánina jarúmadun lubáragiñe fédu ligía. ⁵⁶Jáluajañeinti Jesúsu, dánti le témpulurugúñanu lan, ába jálügüdajan jámagua.

—¿Ca jaríñagubei? ¿Liábinba lídan fédu, ódi miábinbei?

⁵⁷Rújañati fariséogu jáma jábutigu fádirigu dimúrei lun le lan asúbudiruti jalíañein lan Jesúsu, lun lan laríñaguni, barú jamámugei adáúra.

Tájurudaguni ában wúri lugúdi Jesúsu

(Mt. 26.6-13, Mr. 14.3-9)

12 ¹Sísi wéyu lubáragiñe páscua, ába lídin Jesúsu Betánia, le ñi lubei lagánawa Lázaro le lásaaragüdübei jádaangiñe jiláaña lúnnya labágaridun. ²Ába jadúgün ában adíneruni ñi luágu láni fuleísei, Márta, tugúya éjeeraguboun, Lázaro ában jádaangiñe ja núnbaña luágu dábula lúma Jesúsu. ³Ábati tanúgün María ában paénti ibíñei le séruti, ába tájurudaguni lugúdi Jesúsu láu, ába tarágajani láu tídiburi, ába

lejémougadun ibíñei ligía sun ñi múnada. ⁴Ába laríñagun Júdas Iscarióte, le liraú Simón, ában jádaangiñe láni Jesúsu disípulugu, le méme lúnbei lalúguruni.

⁵—¿Ánsan malúgurún lubei ibíñei le luágu úruwa-san fiádürü lun jíderawagún gudémetiña?

⁶Laríñagunbei Júdas ítara, máma luágu berése lan jáu gudémetiña, laríñagunbei ítara ladúga jíweru lan, áni queíti ligía lan gámabarun lágei seínsu, ábaja líwerujan lídaangiñe le íchugúbei tídown. ⁷Ábati laríñagun Jesúsu lun.

—Ígiraboún, taráanseruñadina lubá lachúlürün luwéyuri nábunúniwa. ⁸Súnwandan ñíbaña lan gudémetiña jídan, ánjeinti áu, mámaba súnwandan júma nan.

Elédeguni lubá Lázaro

⁹Ába jasúbudiruni sarágu jádaangiñe juríu luágu níjein lan Jesúsu Betánia, ába jóúdin ñi, mámarügü lun jaríjini, lun giñe jaríjini Lázaro le lásaaragüdübei Jesúsu jádaangiñe jiláaña. ¹⁰Ába giñéti juáradun jábutigu fádirigu lídan ában lun giñe jáfaruni Lázaro, ¹¹ladúga sarágu jáña lan juríu adíseduntiña jawef lun jafíñerun luágu Jesúsu, lídaangiñeti Lázaro.

Lebélurun Jesúsu ubúrugun Jerusalén

(Mt. 21.1-11, Mr. 11.1-11, Lc. 19.28-40)

¹²Sarágu jáña gürígia ñúdüntiña Jerusalén lubá fédu le páscua, larúgan, ába jasúbudiruni luágu lachúlürüba lan Jesúsu ñíjin ubúrugun. ¹³Ábati játüjan tubána fáluma, ába jáfuridun lubároun Jesúsu agúarajeina.

—¡Uweíriguni lun Búngiu! ¡Biníwati le ñúbinbei lídan líri Wabúreme! ¡Biníwati lurúeite Israél!

¹⁴Ába ladárirun Jesúsu ában burígü, ába laweínruni quei laríñagun tídan Lerérun Búngiu.

¹⁵Manúfudebá, ubúругu le Sión,
níten burúeite waríñu luágu ában burígü.

¹⁶Úati yebe gunfaráanda jamáni láni disípulugu cátei le wéyu ligía, lárigiñe, dan le belújali Jesúsu lídown luweírigun yágüta siélu, ába jarítagn luágu bürúwa lan sun cátei le luágu, áni ítara líña lan lasúseredun lun.

¹⁷Ja gürígia ja ñíbaña dan le lagúarun Jesúsu lun Lázaro lídaangiñe lumúaja, ába lásaaragüdüni lídaangiñe ouweni, abájüdagua jamúti le jaríjubei. ¹⁸Ligía lébubei jáfuridun gürígia erésibirei Jesúsu, ladúga jagáambun luágu miláguru le ladúgübei. ¹⁹Ábati jaríñagun fariséogu jámagua.

—Aríja jumáli luágu, siñá lan ladügúniwa ni cáta, sun gürígia añágüran lúma.

Jáluajani güriégu Jesúsu

²⁰Ñínanu güriégu jádan güriá ja ñídünbaña Jerusalén lun jájuduragun lun Búngiu, ²¹ába jayábin güriégu jagía lúmoun Felípe, le Betsáidana, ñi Galiléa, ába jarínagun lun.

—Buséntiwa waríjini Jesúsu.

²²Ába lídin Felípe, ába larínaguni lun Andrés, ába jóudin biángubei jagía abájjudaguei lun Jesúsu. ²³Ábati larínagun Jesúsu joun.

—Chülúja óra lun líchugúniwa uweíriguni nun, áu le Wügúri Garaúwarügüti. ²⁴Ninárün jáu luágu ánjein lan máburujan ában lágu türígu múarugun lun loúnwen, ában mémebei águu, ánjein oúwe, lalúbajóuba sarágu lídaangiñe. ²⁵Le jínsiñejabuti lun libágari, leféridirubei, ánjein le mebéresenti láu libágari lídan uboú le, lareídubei lubá ibágari le magúmchaditi, siélu. ²⁶Le busénti lesériwidunina, kúnti lafálarunina, áni le ñí numuti, ñíbei gíne le esériwidubalina. Le esériwidutina, líchuguba Núguchi uweíriguni lun.

Ladímurejan Jesúsu luágu loúnwen

²⁷‘Níjein ában oúnwenbun líbe samínaü nuágu guetó. ¿Cábasan naríñaga? ¿Naríñaga funa. “Núguchi, sálba bána lídaangiñe le lúnbei lasúseredun nun guetó”? Uá, lun líra niábin. ²⁸Núguchi, iñurúalá bíri nídaangiñe.

Ábati lagaambúniwa ában umálali siéluigiñe le arínagubei.

—Iñúra náali níri bídaangiñe, áni niñúrüyabei.

²⁹Ábati jarínagun güriá ja ñíbaña agáambaja luágu wayújururu lan, jíbiri aríñaga.

—Ában ánjeli adímurejabei lun.

³⁰Ábati larínagun Jesúsu joun.

—Mámatia luágu nufúleisein lagaambúa umálali le, luágu jufúleisein.

³¹Niján dan ligía lun lagúserawagüdún uboú, áni guetóba leféridirei Máfia, le agúmadijabei lídan uboú le, lubáfu. ³²Dánmeti le niñurúniwa múarugugíñe, nanúgübaña súnigubei númoun.

³³Láu líra laríñaguñein luágu loúweba lan luágu ában gurúwa. ³⁴Ába jarínagun güriá lun.

—Agáambaadiwa laliijóun tídan walíburun to lánina lílürudun Moisés luágu labágariduba lan Crístu lun sun dan. ¿Ída liñáti bariñagunbei luágu liñurúaba lan Wügúri Garaúwarügüti? ¿Cáteigi Wügúri Garaúwarügüti ligía?

³⁵Ábati larínagun Jesúsu joun.

—Níchiga mémebei larúgounga jun luágurügü murúsun dan. Eíbuga jumá lídan larúgounga ligía sun anájagua lan júma lun gayáraabei lan jachúlürün le ñíjin lubeí jabúseera jachúlürün, márügüdün lámugaün lubúriga, ladúga le eíbuguti lídan lubúriga, ibídiñeti lun jalíñouñein lan. ³⁶Afíñe jumá lubeíti nuágu sun anájagua lan júma lun lirájüñü jumá larúgounga.

Lárigiñe larínaguni Jesúsu sún buri cátei le, ába lídin, ába larámudagun jaweí.

Lébuna maffñen jamá juríu luágu Jesúsu

³⁷Láu sun adúga lan Jesúsu sarágu miláguuru jagíbugiñe, maffñetiña luágu. ³⁸Láu líra jagúnfulirei le laríñagubei proféta Isaías.

¿Cásan affñerubei luágu wáni ugánu?

¿Ca un larúfudei Wabúreme Búngiu lubáfu?

³⁹Quei maffñerun jabeí, ába lasúseredun le ámu dimúrei le laríñagubei Isaías tídan labúrújan, joun.

⁴⁰Darú lumuti Búngiu jaríjin, derégüda loun janígi,

lun maríjin jamá láu jágu,

úame gunfaráanda jamá,

mayábin jagíame nun lun nareídaguagüdüniña.

⁴¹Laríñagunbalin Isaías le luágu Jesúsu ladúga aríja láali lan luweírigin.

⁴²Láu sun líra, sarágu jáña jádaangiñe juríu affñerutiña luágu Jesúsu ásta jádaangiñe ábutigu, áni maríñagun jamúti bougudi, le janúfude jaweí fariséogu, lueí jabúguniña tídaangiñe jalígilisin. ⁴³Ladúga gúndaatimaatiña láu inébesei le jíchugubei gürígia sügü láu le líchugubei Búngiu.

Lagúseragüdübaña dimúrei buri le laríñagubei Jesúsu gürígia

⁴⁴Ába laríñagun Jesúsu láu umálali jéreti.

—Le affñeti nuágu, máma rügüñein nuágu laffñera, affñeti gíñe luágu Nóguchi le oúnajabalina. ⁴⁵Le gíñe aríjitina, laríjiñein gíñe le oúnajabalina.

⁴⁶Áu lámputei, niábinbei ubouágun lun sun lan ja affñetiña nuágu, merédera jamámuga lídan lubúriga. ⁴⁷Ánjein le agáambuti nerérun áni madúgünti gásu láu, máma áu asíadirubalin, ladúga máma niábiña lun nasíadiruniña gürígia ubouágu, niábiña asálbaraña. ⁴⁸Le mebéresenti náu, madúgün ligía gásu láu nerérun, níjein lúnti lasíadiruni. dimúrei buri le aríñaga náalibei, ligíaba asíadirei lídaanme lagúmujoún wéyu. ⁴⁹Ladúga madímurejaantina luágu náni núngua, Nóguchi le oúnajabalina, ligía aríñagubalin le lúnbei naríñaguni nun lúma le lúnbei narúfudajani. ⁵⁰Áni subúdi numúti luágu barú lan lugúmadin Nóguchi ibágarí magúmuchaditi joun ja adúgübalin le lubeíbei. Le lubeíti naríñagubei, naríñaguni quei laríñaguni Nóguchi nun.

Lachíbuni Jesúsu jagúdi láni disípulugu

13 ¹Ábanrügaali wéyu lubá fédu le páscua. Subúdi láali Jesúsu luágu chülúja lan óra lun lígiruni uboué le lun lídin lúmoun Lúguchi. Súnwandan meja jínsiñe jamá lánigu ja ubouágubaña lun, guetó larúfuduñeinti línsiñejabu lídan luweírín-ágei.

²⁻⁴Dálaalíti Máfia larítágun tídoun lanígi Júdas Isarióte lun ledéregeruni Jesúsu joun láganiñu. Jesúsu, láu sun subúdi láni luágu lúmagiñe lan Búngiu líábin, luágu lúmounba lan gíñe Búngiu lagíribuda, luágu gíñe rúlaali lan

Úguchili sun cátei lújaburugun, ába larúfuduni luweírín-ágei únabuni le luágubei. Dan lubeíti jadíneruña lan, ába lásaarun lueígiñe dábula, ába larágachunun gamísa to tigíbuaguboun ladáüragun, ába lagúrün ában tuáya liránaagua. ⁵Ába líchugun dúna lídoun ában dabárasí, ába lachíbuni jagúdi disípulugu, ába larágachuni táu tuáya to liránaaguaboun.

⁶Dán yebe le lachíbaali lan lugúdi Simón Pédro, ába laríñagun lun.

—Nabúreme, ¿bachíbaalisan nugúdi?

⁷Ába laríñagun Jesúsu lun.

—Guetó, úati gunfaráanda báni le nadúgübei, gunfaráanda bubeí larígiñe.

⁸Ába laríñagun Pédro lun.

—¡Machíbun bubeí nugúdi!

Laríñaga Jesúsu lun.

—Ánjein machíbun nan bugúdi, siñábei gafánran ban núma.

⁹Ába laríñagun Simón Pédro lun.

—Mámarügüla nugúdi bachíba, chibábei gíñe nújabu lúma nigíbu.

¹⁰Laríñaga Jesúsu lun.

—Le sun liñábei lágoun, lugúdi rügüñein abúseera lachibúniwa, ladúga jarúmati líbiri lúgubu. Jugúya, jarúmatün, mámarügü líña sun jugúya.

¹¹Le laríñagunbei luágu máma lan sun jagía jarúmatiña, ladúga subúdi láni cába lan edéregerei.

¹²Lásun lachíbuni Jesúsu jagúdi, ábaya ladáürunun gamísa to larágachuboun, ábaya lañúurun luágu dábula, ába laríñagun joun.

—¿Gunfaráanda jumútisan le nadúgübei jun? ¹³Jugúya agúajatün nun Maésturu, lúma Nabúreme, áni richátün ladúga áu ligía, ¹⁴ánjeinti chibá nubálin jugúdi láu sun Jumáesturun nan áni Jabúreme, lúnti gíñe jachíbuni jugúdi júmagua. ¹⁵Rújadina ában jémpulu jun lun jadúgüni líbe méme le nadúgübei. ¹⁶Ninárün jáu luágu míñugun lan ni ában músu lueí liyúbudiri, ni ában le oúnajoúti lueí le oúnajabalin. ¹⁷Ánjein gunfaráanda jumá buri cátei le áni adúga jumeíme, gúndaabadün.

¹⁸‘Mámatia nadímurejaña juágu sun jugúya, subúdi numútiña cátaña lan nanúadirubaña lun nánigume le tímatimaati. Áni lúnti lagúnfulirún le tídaanbei Lerérun Búngiu. “Garábagua le eígubei núma, nuágun.”

¹⁹Naríñaguñein le jun lubáragiñe lasúseredun, lun dánme lan le lasúseredun, afíñe jumámuga luágu áu lan Crístubei. ²⁰Ninárün jáu luágu le lan erésibiruti le noúnajan, resíbi lumútina gíñe, áni le erésibirutina, resíbi lumúti gíñe le oúnajabalina.

Ladímurejani Jesúsu luágu ledéreguberi lan Júdas

(Mt. 26.20-25, Mr. 14.17-21, Lc. 22.21-23)

²¹Lásun laríñaguni Jesúsu sun cátei le, ába lasándirun sarágu íruni tídan lanígi, ába laríñagun furáangu.

—Ninárün jáu luágu ledéregerubadina lan ában jádaangiñe.

²²Ábati jagúmeserun disípulugu aríagua jawoúguoún, ibídiñounga joun ca lan jádaangiñe uágubei ladímureja Jesúsu. ²³Áu Juan, le abúrújabarun gárada to, ában jádaangiñe disípulugu, le weíribei ínsiñe lun Jesúsu, loúbagiñeñádina lídan adíneruni, ²⁴ába ladúgün Simón Pédro seíni nun lun nálügüdüni Jesúsu ca lan jádaangiñe uágubei ladímureja. ²⁵Ábati nayárafaduntima lun Jesúsu, ába naríñagun lun.

—Nabúreme, ¿cáteisán lúnbei ledéregerunibu?

²⁶Ába laríñagun Jesúsu nun.

—Nadúdüragüda murúsun fein, le únti níchigoun, ligíaba edéregerana. Ábati ladúdüragüdün murúsun fein, ába líchugunun lun Júdas Iscarióte, le liraú Simón. ²⁷Quei lárügüdünun Júdas fein tugúya, ítara lebéllurun Máfia tídoun lanígi. Ábati laríñagun Jesúsu lun.

—Le lúnbei badúgüni, adúgabei furése.

²⁸Úati gunfaráanda láni ni ában jádaangiñe ja eígibaña luágu dábula ca lan uágu laríñagei Jesúsu líra lun. ²⁹Quei Júdas lubei táubei lágei seínsu, sun jaríñagun yebéti laríñaguña Jesúsu lun lun lagáñijani le jabúseerubei lubá fédu, o lun lan líchugun seínsu joun gudémetiña. ³⁰Lárigiñe leíginun Júdas fein, ába láfuridun. Gúñeeli óra ligía.

Iséri gumádi

³¹Lárigiñe láfuridun Júdas, ába laríñagun Jesúsu.

—Laríjúa nuweírigun, áu le Wügúri Garaúwarügüti, guetó, aríjúame luweírigun Úguchili nuágu. ³²Ánjeinti arúfuda nubálin luweírigun Búngiu, larúfudubei gíñe Búngiu nuweírigun, áni ladúgübei madíse. ³³Nirájüñü, úaadináme júma sarágu dan. Jáluajabadina, le méme naríñagubei joun jurúu naríñagayaali jun guetó. Siñábei jídin le ñíjinba lubei nídin. ³⁴Níchigaali iséri gumádi le jun. lun jínsiñegua jumá júngua. Ítara quei jínsiñe nun, lúnti gíñe jínsiñegua jumá júngua. ³⁵Ánjaün jínsiñegua júngua, jasúbudirubei sun güirgía luágu náni jumá disípulugu.

Ladímurejani Jesúsu luágu leyéedaguba lan Pédro luágu (Mt. 26.31-35, Mr. 14.27-31, Lc. 22.31-34)

³⁶Ába laríñagun Simón Pédro lun Jesúsu.

—¿Jalíñounbadibusan, Nabúreme?

Ába laríñagun Jesúsu lun.

—Siñáti bafálarunina le ñíjinbadina lubei guetó, lachúlürüba wéyu lun bafálarubadina lan.

³⁷Laríñaga Pédro lun.

—¿Ca uágu siñá lubei nafálarunibu guetó? Aráanseedina lun níchuguni nibágari buágu.

³⁸Laríñaga Jesúsu lun.

—¿Binárün luágu aráanse ban lun bíchuguni bibágari nuágu? Ninárün báu luágu beyéedaguba lan náu úruwa weíyaasu lubáragiñe layúgurujan gáyu.

Jesúsu, ligía úmabei lun lúmoun Úguchili

14 ¹Merédera jumá láu líbe samínaü, afiñe méme jumá luágu Búngiu, afiñe méme jugúyame nuágu. ²Níjein sarágu ubáraü tídan lúban Núguchi lun jaganoún gürígia ñi, lun jamúga máma lan ítara líña, aríñaga náali jamúga jun. Neíbuga lubeíti aráanseja ában ubáraü jubá. ³Lárigiñeme nídin, aráanse neíme ubáraü ligía, ábame nagíribudunya lun nanúgüntün númagua, lun ñi jumá le méme ñi numuti. ⁴Subúdi jumúti jalíñounbadina lan, subúdi jumúti giñe úma.

⁵Laríñaga Tomás lun.

—Nabúreme, ibídiñeti woun jalíñounbadibu lan, ¿ida lubáti wasúbudiruni úma?

⁶Laríñaga Jesúsu lun.

—Lun lachúlürúniwa lúmoun Búngiu, áu úmabei, áu inárüni, áu ibágari. Nueígiñe rügüñein gayára lan lachúlürúniwa lúmoun Búngiu Úguchili.

⁷Lun jamúga subúdi nan jun buídu, subúdi jumúti jamúga giñe Núguchi, subúdi jumáaliti lúmagiñe guetó, ladúga aríñañaja jumáali láu jaríjinina.

⁸Laríñagati Felípe lun.

—Arúfudabeí Úguchili woun, buídurúgaalime woun.

⁹Laríñaga Jesúsu lun.

—Felípe, lújadina júma, ¿ibídiñegidina bun? Le aríjitina, laríjiñein giñe Búngiu Úguchili, ¿cáti uágu baríñaga nun lun narúfuduni Búngiu Úguchili jun? ¹⁰¿Maffñetibusan luágu anájein lan lídan Búngiu Úguchili, níjein lan giñe Búngiu Úguchili nídan? Lé buri cátei le naríñagubei jun, máma lan láu náni núngua naríñagei, Búngiu Úguchili le aganoúbei nídan, ligía adúgübalin luwádigimari guánarü. ¹¹Afiñe jumá nun luágu anájein lan lídan Búngiu Úguchili, áni lan níjein giñe Búngiu Úguchili nídan, íbini luágurügü cátei lé buri nadúgübei, afiñe jumá nun. ¹²Ninárün jáu, luágu le lan afiñeti nuágu, ladúgübei lan cátei lé buri nadúgübei, ladúgüba buri cátei weínamutimaati, ladúga áu, neíbuga le ñíjin lubeí Núguchi. ¹³Sun le jamúriajan lídan níri, nadúgübei, arúfuda námugei luweírigan Núguchi. ¹⁴Nadúgübei furúmiegurügü cátei le jamúriajan lídan níri.

Líchugun Jesúsu dimúrei luágu loúnajabei lan Sífiri Sándu

¹⁵Ánjein jínsiñe nubeí jun, gúnfuli jumá láu le nubeíbei, ¹⁶ábame nayúmuragun lun Núguchi lun loúnajan ámu jun newéñegua lun líderaguntün, lun giñe líchugun gurásu jun. Ligíaba Sífiri Sándu le subúdijabúbei lun sun inárüni, júmabei súnwandan. ¹⁷Ja lánigu ubou le, siñáti jerésibiruni Sífiri Sándu ligía, ladúga siñá lan jaríjini ni jasúbudiruni, ánjein jugúya, subúdi jumáali, ladúga níjein júma

áni leréderuba jídan. ¹⁸Mígirun nubádün jábugua, nagíribudayaba lun júma nan. ¹⁹Máltijadina ánjana maríjin jamá güriquia, ánjein jugúya, jaríjbadina, áni gabágaribadün ladúga wínwañu níña lan. ²⁰Lárigiñeme liábin Sífriri Sándu lun júma lan lun sun dan, jasúbudirubei luágu anájein lan lídan Nóguchi, jugúya nídan, áu gíñe jídan. ²¹Le subúdíjbuti lun nugúmadin áni úaragu ligía lúma, arúfuda lumúti luágu jínsiñe nan lun le tímatimaati. Áni jínsiñejabúbei Nóguchi lun le jínsiñejabuti nun, jínsiñebei gíñe nun, arúfudagua áume núngua lun.

²²Ába laríñagun Júdas (mámatia le Isarióte).

—¿Cásan uágu barúfudaguba lubeí búngua woun, máma joun güriquia ja lánigu uboú le?

²³Laríñaga Jesúsu lun.

—Le jínsiñejabuti nun, adúgati gásu láu le nubeíbei, áni línsiñeduba lun Nóguchi, ábame wayábin, áu lúma Nóguchi, agánawa lúma.

²⁴Le mínsiñejabuti nun, madúgünti gásu láu le nubeíbei. Dimúrei le naríñagubei, máma náni, lání Nóguchi le oúnajabalina.

²⁵Naríñaguñein sun le jun láu anájagua lan júma, ²⁶Sífriri Sándu le lúnbei loúnajani Nóguchi lídan níri lun líderaguntün, larúfudajaba jun, larítaguagüdübadün gíñe luágu sun le aríñaga náalibeí jun.

²⁷Nefbuga júmagiñe, nígiraali ñurúguaü júma—ában luwúyeri ñurúguaü le áurügübei gayára lan níchiguni. Mítaraanti queísi ñurúguaü le líchugubei uboú. Magíbedalá jisáminan, manúfude jugúyame. ²⁸Agáamba jumáali naríñagun luágu nefbuga lan, áni nagíribudayaba lan lun júma nan, lun jamúga jínsiñe nan jun láu jinárün, gúndaatün jamúga láu jasúbudiruni luágu nefbuga lan lúmoun Nóguchi, ladúga ligía íñugutimaati nueí. ²⁹Ligía aríñaga gíñe nubálin le jun, lun dánme lan lasúseredun, afíñe jumámuga.

³⁰Madímurejaanjadina sarágu júma, ladúga níteeli le agúmadijabei lídan uboú le. Láu sun mabáfu lan nuágu, ³¹lúnti ítara lúba lan lun lasúbudiruni uboú luágu jínsiñe lan Nóguchi nun, áni adúga náni le lubeíbei nun. Sarájuma, queímoun yágiñe.

Tídibu beíbei lúma tilímun

15 ¹Laríñaga Jesúsu.

—Ítara níña quei ában tídibu beíbei le tímatimaati, Nóguchi, ítara líña quei le oúnigirubarun nádü. ²Chaún lumuti furúmieguarügü lídaangiñe nilímun le míinti, atírimuma lumúti le gíinbei, jarúmagüdaleí lúntima lagíindun. ³Jugúya, jarúmaadün lárigi narúfudajan jun. ⁴Lídan méme jumá ában núma quei lídaañadina lan ában júma. Ában límu siñáti lagíindun ánjein mámañein lubeí luágu ídibu, ítara jíña gíñe, siñáti jagíindun ánjein máma lubeí badúleñu jíña nuágu.

⁵Áu ídibubei, jugúya límu. Le badúleñuti nuágu, badúleñu áu luágu, lagíinduba gíbe, siñáti jadúgiin ni cáta úouga áu. ⁶Le merédeti badúleñu nuágu, lágurúba bougudin, ábame lamábeidun quei buri límu le abúdajóubei lun lagudúniwa.

7'Ánjaün asígira badúleñu nuágu, mabúlieidun jumeíme le narúfudajabei, gayáraabei jamúriajani le jabúseerun, áni jibíjubei. 8Ibíjati Núguchi inébesi dan le gíbe lan jagúindun, áni arúfuda jumúti luágu náni jumá disípulugu ja tímatimaatiña láu líra. 9Jínsiñetün nun ítara quei nínsiñe lun Núguchi, ítara méme jumá lubeíti lídan ínsiñeni le nánibei jun. 10'Ánjaün núdün láu le nubefbei, lídan mémebadün ínsiñeni le nánibei jun, ítara quei nídín láu le lubeíbei Núguchi, áni lídan mémeñadina ínsiñeni le lánibei nun.

11'Nadímurejánbei jun ítara lun gayára lan jasúbusiruni úgundani le níchugubei, le gumúti. 12Niján nugúmadinbei. lun jínsiñegua jumá júngua quei jínsiñe nun. 13Luweírín-ágei ínsiñeni le gayáraabei gáni láni gürígia, lun líchuguni libágari jawágu lumádagu. 14Numádagu jugúya, ánjein jadúga le nubefbei. 15Manúgün náadün quei músu, ladúga ibídiñeti le ladúgübei liyúbudiri músu lun, nanúgünün quei numádagu ladúga subúdigüda náali sun le laríñagubei Núguchi nun jun. 16Máma jugúya anúadajabalina, áu anúadajabalün, áni rújadina dimúrei jun lun jagúindun gíbe, lun gíñe ladúraruñ jin. Ítara lúba líchuguni Núguchi sun le jamúriajan lúma lídan níri jun. 17Ítara líña lubeíti nugúmadin jun lun jínsiñegua jumá júngua.

Iyéreeguti Jesúsu jáu sun lánigu lun uboú

18'Ánjaün iyéreeguda lun uboú, subúdi jumeí luágu áu lan iyéreegudubei lun furúmiñe. 19Lun jamúga lánigu jumá uboú, jínsiñetün jamúga joun gürígia ja lánigu uboú quei jínsiñe jánigu joun. Anúadaja numútün jádaangiñe ja lánigu uboú, ligía jiyéreegunbei lun uboú ladúga mámaadün lan láni uboú. 20Jarítagua jumá luágu le naríñagubei jun. "Úati músu íñuguti lueí liyúbudiri." Ánjein eíbaaja jamáadina lubeí, jeíbaajabadün gíñe, ánjein giñéti madúgün jabeí gásu láu narúfudajan, madúgünbaña gíñe gásu jáu. 21Jadúgübei sun le jun, nueígiñe, ladúga ibídiñe lan le oúnajabalina joun.

22'Lun jamúga meja miábin nan adímureja joun, madúnruntiña jamúga luágu jamájarun lun jerésibirunina, queísiti niábin joun, gadúnruntiña lubeíti luágu figoú ligía. 23Ja iyéreejabúbaña nun, iyéreeguti gíñe Núguchi joun. 24Madúnruntiña jamúga lun jamúga madúgün nan ni cáta le úagili adúgüti jagánagua, guetó aríja jamáali buri cátei ligía áni láu sun líra iyéreegugidina joun, iyéreegu gíñe Núguchi joun. 25Wel, lasúseredunbei le ladúga lúnti lan lagúnfulirun dimúrei le bürúwañubei lídan jalúrudun. "Ába niyéreegudun joun, mébunouga."

26'Dánme liábin Sífiri Sándu le lúnbei líderagunün, Espíritu le lánina inárüni le lúnbei nouñajani luágu loúbadina Núguchi, ligíaba adímureja luágu náni fuleísei. 27Jugúya, jadímurejaba gíñe luágu náni fuleísei, ladúga númañadün lan lúmagiñe furúmiñeti dan.

16 1'Naríñaguñein buri cátei le jun lun moúnwen lan jafíñen nuágu. 2Jabúgagubadün tídaangiñe jalígílisin, wuríbabei dan jun daríme lun ánjaün lan láfaragua furúmierügü gürígia jilágubei,

larítaguba luágu lesériwiduñein lan Búngiu láu líra. ³Jadúgübei líra ladúga masúbudirun jamágili lan Núguchi, masúbudirun jamána. ⁴Naríñaguñein le jun, lun dánme lan le lachúlürün dan ligía, lun jarítagun luágu aríñaga náali lán meja jun.

Le ladúgübei Sífiri Sándu

‘Maríñagun numúti meja le jun lúmagiñe binárü ladúga meja júmañadina lan, ⁵ánjein guetó, neíbuga lúmoun le oúnajabalina. Málügüdün lumútina ni ában jídaangiñe jalíñounbadina lan, ⁶jírurügütün luágu naríñaguni cátei lé burí jun. ⁷Inárüni naríñagubei jun. buítimaati jun lun nídín, ladúga ánjana mídin, miábinbei Sífiri Sándu júmoun lun líderagunün, áni ánjana ñüdün, nouñajabei. ⁸Dánme liábin, ladáriraguagüdübaña gürgía ja uboúagubaña jóungua luágu gafígoun jamá, luágu gíñe níjein lan ában úma le lánina úarani, luágu gíñe lagúseragüdübaña lan Búngiu. ⁹Larúfudubei joun luágu gafígoun jamá láu mafíñen jamá nuágu, ¹⁰lasúbudiragüdübei joun luágu úaragua nan, láu larúfuduni joun luágu nídiba lan le ñíjin lubei Núguchi dánme le nígirunün. ¹¹Líchuguba fe joun luágu lagúseragüdün Búngiu, ladúga agúseragüda lálali Máfia, le agúmadijabei lídan uboú le.

¹²Gíbegili lúnti naríñaguni jun, jásiñerubei gunfaráanda guetó. ¹³Dánme liábin Sífiri Sándu le lánina inárüni, larúfudajabei sun inárüni jun, ladúga madímurejanbei luágu láni lúngua, le lagáambubei, ligíaba laríñaga. Lasúbudiragüdübei cátei lé burí lúnbei lasúseredun jun. ¹⁴Líchuguba inébasei nun, ladúga lerésibiruba lídaangiñe ninárün, ábame lasúbudiragüdüni jun. ¹⁵Sun le lúmabei Núguchi, náni gíñe, ligía naríñagunbei luágu lerésibiruba lan Sífiri Sándu lídaangiñe ninárün, ábame lasúbudiragüdüni jun.

Lasáansiraguba íruni lun ugúndanime

¹⁶Málüjadina, ánjana maríjin jumá, múrusunmeya dan lárigiñe, ábayame jaríjinina, ladúga neíbuga le ñíjin lubei Núguchi.

¹⁷Ábati jálügüdagun jádaangiñe láni disípulugu jámagua, ába jaríñagun. —¿Cásan míni lan le? Laríñaga woun luágu málüjali lan ánjein maríjin wamá, múrusunya lánme dan lárigiñe, ábayame lan waríjini, ladúga leíbuga lan le ñíjin lubei Lúguchi. ¹⁸¿Ca míni lan láu “múrusun dan lárigiñe le”? Úati gunfaráanda wamáni ca lan uágu ladímureja.

¹⁹Ába lasúbudiruni Jesúsu luágu busén jama jálügüdaguni, ába laríñagun joun.

—Aríñagatina jun luágu málüjadina lan ánjana maríjin jumá, múrusun lánme dan lárigiñe, ábaya lánme jaríjinina. ¿Ligía le uágubei jálügüdagua júmagua? ²⁰Ninárün jáu luágu jayájuba lan, jírugua jugúyame, ánjañati gürgía ja láni uboú le, jagúndaaruba. Láu sun líra, íbini jíru jumá, lasáansiraguba íruni lun ugúndanime. ²¹Dan le tagúriajan lan ában wúri, súfuritu ladúga chülúja

lan lórate igári, lásun agúriajouaali lan irájü, marítangunjaru luágu igári, ladúga ugúndani le tasándirubei luágu agúriajaru lan ában irájü ubouágu. ²²Ítara lína gíne, jugúya jírütün guetó, naríjayabadün, ábamei tabuínchun janígi láu ugúndani, ában ugúndani le úati gayáraati lagídaruni jueí.

²³Lídaanme wéyu ligía, málügüdün jumádiname luágu ni cáta. Ninárün jáu luágu líchugubei lan Nóguchi sun le jamúriajabei lídan níri lúma, jun. ²⁴Chülú lúmoun dan le, mamúriajangidün ni cáta lídan níri, jamúriaja, ábame jibíjin, buin jumámuga láu ugúndani.

Jesucrístu, le ásiiragúbalin ubou

²⁵Aríñaga náali buri cátei le jun láu jémpulu, inítebei dan lun madímurejaanjadina lánme jun láu jémpulu, ábame nadímurejan furáangu jun luágu Búngiu Úguchili. ²⁶Lídaanme wéyu ligía, jamúriajaba lúma lídan níri, maríñaguntina luágu nayúmraguba lan lun Nóguchi juágu, ²⁷ladúga ligía guánarü jínsiñetün lun. Jínsiñetün lun ladúga jínsiñe nan jun, affíneedün gíne luágu lúmagiñe lan Búngiu niábin. ²⁸Lúmagiñe Búngiu Úguchili náfurida, ába niábin lídoun ubou le, guetó nígiraali ubou le, neíbugaya lúmoun Nóguchi.

²⁹Ába jaríñagun láni disípulugu.

—Anáti guetó, badímurejaña furáangu, mayúsurunga jémpulu. ³⁰Aríja wamáali guetó luágu subúdi lan sun cátei bun, moún lumuti bálügüdün luágu ni cáta ladúga subúdi báni jarítangun güri-gia. Luágu líra waffínera luágu lúmagiñe lan Búngiu biábin.

³¹Ába laríñagun Jesúsu joun.

—¿Affínedüti guetó? ³²Iníteeli óra, áni guetó guetó, dánme le jachágaragun sun jugúya, cáda ában luágu loubadina, ábame jígirunina nábugua, láu sun máma lan nábuguañadina ladúga níjein Nóguchi núma. ³³Naríñagunbalin sun le jun, lun jadárirun ñurúguai lídan jaffínerun nuágu. Jasúfuriruba ubouágu, ganígi jumá, ¡sirí-gua náali ubou!

Layúmuragun Jesúsu jawágu láni disípulugu

17 ¹Lárigiñe laríñaguni Jesúsu sun cátei le, ába laríjin siélun, ába laríñagun. —Nóguchi, chülúja nidáani, rúba inébeisei luágu Biraú, ru lámuga gíne Biraú inébeisei bun. ²Rújadibu ubáfu lun Biraú jawágu sun güri-gia lun líchugun ibá-gari magúmchaditi joun ja bíchugubaña lun. ³Niján lébunabei ibá-gari le magúmchaditi, lun jasúbudirunibu güri-gia amúrü le Búngiu ábanrügüti, le inárüti, lúma lun jasúbudirunina, áu Jesucrístu le bouñajabei.

⁴Rújadina uweíriguni bun ya ubouágu, gumú nan gíne le uágubei bouñajana. ⁵Guetóti Nóguchi, rúbei uweíriguni le méme méja nánibei nun biñúwarü lubáragiñe meja ñi lan ubou.

⁶Subúdigüda náali joun ja baságarubaña lídaangiñe ubou lun bíchuguniña nun, cátabu lan. Bánigu meja, ába bíchuguniña nun, ñüdüntiña láu le bubeíbei. ⁷Guetó, subúdi jamáali luágu sun lan le

bíchugubei nun búmagiñe lan liábin, ⁸rúnaali ugánu le bíchugubei nun joun áni resíbi jamúti, subúdi jamáali luágu inárüni lan luágu búmagiñe lan niábin, afíneeña gíñe luágu amúrü lan oúnajabalina.

⁹Ayúmuraguatina bun jawágu, mayúmuraguntina jawágu lánigu uboú, nayúmuragun jawágu ja bíchugubaña nun, ladúga báni jamá. ¹⁰Sun le náni, báni, le báni, náni, arijúati nuweírigun jawágu.

¹¹Áu, meréedina uboúagu, ánjein jagía, jeréderuba. Áu, nefbuga búmoun. Nóguchi sánduti, toínigi baña ja bíchugubaña nun láu bubáfu luei jeíguadun, lun lídan jamá ában le tímatimaati quei áu búma. ¹²Dán meja le jáma nan uboúagu, toínigi numútiña meja ja bíchugubaña nun láu bubáfu, meféridiruntina ni ában jádaangiñe lueídügü Júdas, lun lagúnfulirun le bürüwañubei tídan Berérun.

¹³Guetó, nefbuga le ñíjin bubei, luágu anájagua lan uboúagu aríñaga numúti buri cátei le lun jabuínchun láu ugúndani méme le nuágubei.

¹⁴Rúnaali berérun joun, ába jeyéreegudún lun uboú, ladúga máma jamá lánigu uboú ítara queísi máma lan lánigu uboú áu. ¹⁵Mamúriajaantina búma lun baságaruniña uboúagugiñe, namúriajan búma lun batoúnigiruniña luei Máfia. ¹⁶Ítara quei máma lan láni uboú áu, máma gíñe láni uboú jagía.

¹⁷Derégeguagüda baña jóungua bun, láu lubáfu berérun le inárütibeí.

¹⁸Quei boúnajanina jádoun lánigu uboú láu ugánu lánina asálbaruni, ítara gíñe noúnajaniña jádoun lánigu uboú láu ugánu ligía. ¹⁹Áni derégeguatina núngua bun jawágu, lun gíñe jedéregeragun jóungua bun le tímatimaati.

²⁰Máma rügüñein jawágu namúriaja búma, amúriajatina gíñe jawágu ja lúnbaña jafíñerun nuágu dánme le jagáambuni ugánu lánina asálbaruni jámagiñe. ²¹Amúriajatina búma lun lídan jamá ában sun jagía, lun ában méme jamá cátei wáma quei áu búma, amúrü núma, lun lídan jamá ában buídu buídu, lun lafíñerun uboú luágu boúnajan nan. ²²Rúnaali uweíriguni le méme bíchugubei nun joun, lun ában méme jamá cátei quei ában méme wamá cátei áu búma, ²³áú jádan, amúrü nídan, lun jayábin lun ában mémebaña lan buídu buídu, subúdi lámugei uboú luágu boúnajan lan áu, áni jínsiñe jamá bun sarágu quei nísiñe bun.

²⁴Nóguchi, amúrü íchugubaliña nun, buséntina lun númabaña lan le ñí numuti, lun jaríjini uweíriguni le bíchugubei nun, ladúga jínsiñegubeiñadina bun lubáragiñe ladügüniwa uboú. ²⁵Nóguchi richáguati, ibídiñetibu lun uboú, subúditibu nun, subúdi jamáali gíñe wügüriña ja luágu boúnajan lan áu. ²⁶Subúdigüda náali joun cátabu lan, áni nasúbudiragüda mémebadibu, lun ñi lan ínsiñeni le buágubei nun jádan, lun gíñe ñi nan já dan.

Janúgüni Jesúsu adáüra

(Mt. 26.47-56, Mr. 14.43-50, Lc. 22.47-53)

18 ¹Lárigiñe laríñaguni Jesúsu cátei le, ába láfuridun jáu láni disípulugu lun jóúdin loubáfurugun dúna le cedrón. Ñíñein ában fulásu lé buri ñí lumuti tídibu olívos, ñíjin lubei lebélera Jesúsu jáu láni disípulugu. ²Subúdi

lumúti gñe Júdas le alúgurubalin Jesúsú, fulásu ligía, ladúga oúndaraguañajaali Jesúsú ñi jáma láni disípulugu. ³Ába lubeíti lachúlürün Júdas ñjin jáu sarágu súaara jáma polisía ja tánina témpulu, jóunajan jábutigu fádirigu jáma fariséogu. Gárumatetiña, barútiña gñe lámpu lúma tóchi. ⁴Quei subúdi láali lan Jesúsú le lúnbei lasúseredun lun, ába láfuridun, ába laríñagun joun.

—¿Ca jáluajabei?

⁵Ába jaríñagun lun.

—Wáluajañein Jesúsú le Nazarétna.

Laríñaga Jesúsú joun.

—Áu Jesúsú ligía le jáluajabei.

Ñíñeinti Júdas le edéregerubalin jáma. ⁶Dan laríñagunbei Jesúsú joun luágu ligía lan le jáluajabei, ába jeíguadunga múarugún janagóun.

⁷Ábaya laríñagun Jesúsú joun.

—¿Ca jáluajabei?

Ába jaríñagun lun.

—Wáluajañein Jesúsú le Nazarétna.

⁸Ábati laríñagun Jesúsú joun.

—Aríñagaadinatia jun luágu áu lan. Ánjein áu lubefí jáluajabei, ígira jumáña ja lun jóúdin.

⁹Lasúseredunbei líra lun lagúnfulirun le laríñagubei Jesúsú guánarügü. “Meféridirúnti ni ában jádaangiñe ja líchugubaña Núguchi nun.” ¹⁰Ábati laságarunun Simón Pédro lefeñte, ába líbuguni larígei ában lumúsun fádiri le íñutimaabei gíriti Málco. ¹¹Ába laríñagun Jesúsú lun Pédro.

—Dáboun befeñte tárigoún. ¿Jarítaguatibu funági luágu moun lan nasúfuriruni oúchawagúni le líchugubei Núguchi lun nasúfuriruni?

Jesúsú ligíbugiñe fádiri le íñutimaabei

(Mt. 26.57-58, Mr. 14.53-54, Lc. 22.54)

¹²Ábati janúgüni súaara, lúma gumándan, jáma japolisían juríu, Jesúsú adáüra, ába jagúraguni. ¹³Lárigiñe, ába janúgüni lúbiñoun Anás. Anás ligía limédamurubei Gáifasi, fádiri le íñutimaabei lídan irúmu ligía. ¹⁴Gáifasi ligía, le méme meja aríñagubei joun juríu luágu buítima lan joun lun loúnwen ában wügúri jawágu sun mútu.

Leyéedagun Pédro luágu subúdi láni Jesúsú

(Mt. 26.69-70, Mr. 14.66-68, Lc. 22.55-57)

¹⁵Ába wóúdin, áu Juan lúma Simón Pédro, lárigi lárigi Jesúsú. Áu, subúditina lun fádiri le íñutimaabei, ábati nebélurun lúma Jesúsú lídoun tübürürü lúban fádiri, ¹⁶ánjeinti Pédro, ába leréderun bougudi luágu béna. Ligía náfuridunbei, ába nadímurejan túma to oúnigirubalin béna, ába nebelaagüdüni Pédro. ¹⁷Ábati tálügüdüni oúnigirutu béna Pédro.

—¿Ma bugúya ában jádaangiñe láni güriquia le disípulugu?

Laríñaga Pédro.

—Uá, máma áu.

¹⁸Queíti dilíga lubeí, fúguatiñati músu jáma polisía wátu, rára jañáti ñi abácharagua. Níñein gíñe Pédro jáma, abácharagua larúgürügü wátu.

Lálügüdaguni fádiri le íñutimaabei Jesúsu

(Mt. 26.59-66, Mr. 14.55-64, Lc. 22.66-71)

¹⁹Ába lagúmeserun fádiri le íñutimaabei álügüdaguei Jesúsu cátaña lan lánibaña disípulugu, cátei lan gíñe larúfudajabei. ²⁰Laríñaga Jesúsu lun.

—Boúgudi nadímureja ligíbugiñe sun uboú, súnwandan narúfudajan tídan ligílisi lúma témpulurugu le ñí lubei jóundaragua sun jurú, madúgüngidina lubeíti ni cáta arámudaguati. ²¹¿Ca uágu bálügüdana? Álügüda báña ja agáambubalina, jagíalá aríñagei le uágubei nadímureja joun. Subúdi jamúti le naríñagubei joun.

²²Dan laríñaguni Jesúsu cátei le, ába liábin ában jádaangiñe polisía ja tánina témpulu, ába lagáyuajan ligíbuagun, ába laríñagun lun.

—¿Ítara lúba boúnabuni fádiri le íñutimaabei?

²³Laríñaga Jesúsu lun.

—Ánjein aríñaga nubeí wuríbatí, aríñagabeí jalíañein lan luríban, ánjeinti buídu lubeí le naríñagubei, ¿ca uágu bagáyuaja nuágu?

²⁴Ábati loúnajani Anás gürágu lun Gáifasi, fádiri le íñutimaabei lídan irúmu ligía.

Leyéedagunya Pédro luágu Jesúsu

(Mt. 26.71-75, Mr. 14.69-72, Lc. 22.58-62)

²⁵Sun dan le, nijágua Pédro abácharagua larúgürügü wátu, ába jaríñagun lun.

—¿Másan amúrú ában jádaangiñe láni güriquia le disípulugu?

Ába leyéedagun Pédro, ába laríñagun.

—Uá, máma áu.

²⁶Ábati lálügüdüni ában jádaangiñe lumúsuniña fádiri le íñutimaabei, ában lidúje le líbugubei Pédro arígei.

—¿Máfunagi aríja numútibu lúma lídan fulásu lé buri ñí lumuti tídibu olívos?

²⁷Ábaya leyéedagun Pédro, lídan óra ligía, ába layúguruhan gáyu.

Jesúsu ligíbugiñe Piláto

(Mt. 27.1-2, 11-14, Mr. 15.1-5, Lc. 23.1-5)

²⁸Ábati janúgüni Jesúsu lúbiñegiñe Gáifasi lun lúbiñoun gumándan. Arúgadeina liñáti, mebélutiñati juríu palásiurugún lueí marúma jamá, siñáme gádan láníña adíneruni le lánina páscua. ²⁹Ligía láfuridunbei Piláto lun ladímurejan jáma, ába laríñagun joun.

—¿Cásan lidúnrunbei güriquia le jurúma?

³⁰Ába jaríñagun lun.

—Lun jamúga madúgün lan wurfbani, medéregerun wamúti jamúga bun.

³¹Ábati laríñagun Piláto joun.

—Barújumei, agúseragüda jumei quei laríñaguni jilúrudun guánarü. Jaríñaga juríu lun.

—Wagía juríu, maríchatiwa lun wáfarun ni ában jilágubei.

³²Ítara líña lagúnfulirún le laríñagubei Jesúsu luágu ligáburu ída lúba lan loúnwen. ³³Ábaya lebélorun Piláto palásiurugun, ába lagúarun lun Jesúsu, ába laríñagun lun.

—¿Amúrü Jarúeitebei Juríu?

³⁴Ába laríñagun Jesúsu lun.

—¿Luágu báni búngua bálügüdaja luágu líra, ódi ladúga jaríñaguni ámu bun nuágu?

³⁵Laríñaga Piláto lun.

—¿Juríu funági áu? Binásiñun jáma jábutigu fádirigu, jagía edéregerubalíbu nun. ¿Cági bidúnrunbei?

³⁶Ábati laríñagun Jesúsu lun.

—Narúeijan máma lánina uboú le, lun jamúga ítara líña lan, jageíndaguña jamúga nánigu lun medéregerúniwa nan joun juríu. Máma yána narúeijan.

³⁷Ábati laríñagun Piláto lun.

—¿Urúei lubéti amúrü?

Laríñaga Jesúsu lun.

—Urúei áu quei baríñaguni. Agúriajouátina, ñúbin áu lídoun uboú le lun naríñaguni le inárünibeí. Sun ja gagáambadibaña lun inárüni, agáamba jamúti le naríñagubei.

³⁸Laríñaga Piláto lun.

—¿Cáteiti inárünibeí?

Lasíadirúniwa Jesúsu lun ouweni
(Mt. 27.15-31, Mr. 15.6-20, Lc. 23.13-25)

Lárigiñe ladúgüni Piláto álügüdajani le, ábaya láfuridun adímureja jáma juríu, ába laríñagun joun.

—Madáritina ni murúsun dúru luágu wügúri le. ³⁹Quei jéchu jumá lun nígiragüdün ában adaürúti jun lídan fédu le láni páscua, ¿buséntün lun náfuridagüdüni Jesúsu le jarúeitebei juríu?

⁴⁰Ábaya jagúaragun sun jagía.

—¡Mígiragüdabeí le! ¡Barabáslá bígiragüda!

Barabási ligía, ában jíwer uti.

19 ¹Ábati lanúgüni Piláto Jesúsu, ába loúnajan abeíchagüdei, ²ába jíchugun ában súdaara ába rídi láuti jíyu leréberugu Jesúsu, ába jadáuraguagüdüni táu ában anáanguni colóru gúchu. ³Ába jayárafadun lubádun dan méme aríñageina.

- ¡Gabágarilá Jarúeite Juríu!
 Ába jagáyuajan ligíbuagun.
- ⁴Ábayati láfuridun Piláto, ába laríñagun joun juríu.
 —Naságaraali ñájoun lun jasúbudiruni luágu madári nan dúru luágu.
- ⁵Ába láfuridun Jesúsu láu rídi láuti jíyu lábulugu, táu lanáangun colóru gúchu. Ábati laríñagun Piláto joun.
 —¡Niján wügúri ligía!
⁶Dan jaríjnbalin jábutigu fádirigu jáu sun polisía, ába jagúmeserun agúaraja.
 —¡Dáguabeí luágu gurúwa! ¡Dáguabeí luágu gurúwa!
 Laríñaga Piláto joun.
 —Barújumeiti, dágua jumeí luágu gurúwa, ladúga áu, madáritina ni murúsun dúru luágu.
- ⁷Ába jaríñagun juríu lun.
 —Wagía galúruduntiwa áni según walúrudun, lúnti loúnwen ladúga laríñagun luóugua luágu Liraú lan Búngiu.
- ⁸Dan lagáambunbalin Piláto le, ábatima lanúfudedun. ⁹Ábaya lebélorun palásiurugun, ába laríñagun lun Jesúsu.
 —¿Jalíanasan amúrü?
 Moúnabunti Jesúsu ni cáta.
- ¹⁰Ábati laríñagun Piláto lun.
 —¿Moúnabun bumútina? ¿Ibídíñetísan bun luágu gabáfu nan lun nígiragüdünibu, gabáfu áu lun nádaraguagüdünibu luágu gurúwa?
- ¹¹Laríñaga Jesúsu lun.
 —Úati jamúga ni murúsun ubáfu búma nuágu lun jamúga míchu láni Búngiu bun, ligía weírítima lubeí lidúnrun le edéregerubalina bun sügú báu.
- ¹²Lúmagiñe óra ligía, ába lálugun Piláto ída lúba lan lígiragüdüni Jesúsu. Ába jagúaragun juríu lun.
 —¡Ánjein bígiragüda, máma amúrü lumáda urúei Rómana!
 ¡Furúmieguarügü le aríñaguti luóugua luágu urúei lan, lágani urúei Rómana!
- ¹³Dan lagáambunbalin Piláto líra, ába loúnajan aságarei Jesúsu, ába lañúurun luágu jalaú le agúseragülei, ubáraü le únbei jaríñaga Dúbü, Gabáta lídan jerérun juríu. ¹⁴Queí buri amídirugujaali, le ában wéyu lubá páscua. Ábati laríñagun Piláto joun juríu.
 —¡Niján jurúeite!
¹⁵Ába jagúaragun.
 —¡Jilála! ¡Jilála! ¡Dáguabeí luágu gurúwa!
 Laríñaga Piláto joun.
 —¿Buséntün nádaraguni jurúeite luágu gurúwa?
 Jaríñaga jábutigu fádirigu lun.
 —Marúeitetiwa ámu lueí urúei Rómana.
- ¹⁶Láu líra, aba ledéregeruni Piláto joun lun ládarawagún luágu gurúwa, ába janúgüni.

Ládarawagún Jesúsu luágu gurúwa
(Mt. 27.32-44, Mr. 15.21-32, Lc. 23.26-43)

¹⁷Ábati láfuridun Jesúsu barúinalei lugúruwan lun lídin lídoun fulásu le únbei jaríñaga Lufúlasun Lábu Ichúgü, Gólgota lídan jerérun juríu. ¹⁸Ñi jádaraguei luágu gurúwa, dágua jagía bián wígüríña úara lúma, ában lueígiñe cáda loúba. ¹⁹Ába loúnajan Piláto íchigagüda ában abúrújoúni luágu gurúwa, laríñaga ñi. “Jesúsu Nazarétna, Jarúeite Juríu”. ²⁰Sarágu jáña jádaangiñe juríu alíjati abúrújoúni ligía ladúga fulásu le ñi lubei jádaraguei Jesúsu luágu gurúwa, madíseti ubúrugugiñe, áni abúrújoúati abúrújoúni ligía lídan buri dimúrei hebréo, güríegu, lúma latín. ²¹Ligía jaríñagunbei jábutigu jafádirin juríu lun Piláto.

—Mabúrüdabá ñi “Jarúeite Juríu”, bürúba “Le aríñagubei luágu Jarúeite lan Juríu.”

²²Ába laríñagun Piláto joun.

—Le bürúnaalíbei bürúnaalíbei, ítara lúba.

²³Lárigiñe jádaraguni súdaara Jesúsu luágu gurúwa, ába janúgünun lanáangun, ába jadúgün gádürü fánreinti táu, ába fánreinti lun cáda súdaara. Ába giñe janúgünun lisímisin, quei májüchawagún tubeí, ában rügüñoun fiésu ñnugiñe lun únabun, ²⁴ába jaríñagun súdaara jámagua.

—Majeíridagua wamoún, ájurerera wamá tuágu, aríja wamáwuga cába lan agáñiroun.

Ítara líña lagúnfulirun le taríñagubei Lerérun Búngiu. “Fánreingua jamútu nanáangun jádaangua, ájurerera jagía tuágu nisímisin cába lan agáñiroun.” Ítara líña lubefti jadúgüni súdaaragu.

²⁵Ñíñoun lúguchu Jesúsu yaráfa lun gurúwa túma tamúlelua, María to lúmari Cléofas, túma María Magdaléna. ²⁶Dan laríjinbarun Jesúsu lúguchu rára nubádu, áu le disípulu lé jínsiñebei lun sarágu, ába laríñagun tun lúguchu.

—Núguchu, nirán biraú.

²⁷Ába laríñagun nun.

—Nurán búguchu.

Lúmagiñe óra ligía, ába nerésibirunun núbiñe.

Loúnwen Jesúsu
(Mt. 27.45-56, Mr. 15.33-41, Lc. 23.44-49)

²⁸Lárigiñe sun cátei le, quei subúdi láni Jesúsu luágu gúnfulijali lan láu sun le lúnbei ladúgüni luágu wasálbarun, ába laríñagun, lun lagúnfulirún le taríñagubei Lerérun Búngiu.

—Mágürabujadina.

²⁹Ñíñein ában fúdu táu diweín garújütu, ába jadúdüragüdün ában mudúsi tídan diweín tugúya, ába jíchuguni luágu ában wéwe, ába jíñúrui luágun liyúma. ³⁰Ába látunun Jesúsu diweín garújütu tugúya, ába laríñagun.

—Gúnfulija sun cátei.
Ába larábachun ligíina, ába loúnwen.

Límiruni ában súdaara loúba Jesúsu táu lefeínte

³¹Wéyu ligía, ában wéyu lubá páscua, mabúseeruntiñati juríu lun leréderun jágubu gürígia luágu gurúwa lídan wéyu le eméraguagülei, ladúga weíríti wéyu ligía. Ligía jamúriajaanbei lúma Piláto lun loúnajan ájalajei járuna ja dáwaguñubaña luágu gurúwa, lun gíne lagídarún jágubu nígiñe. ³²Ábati jóudin súdaara, ába jájalachuni lúruna furúmiñeti, jalá jameí lúruna le ában le dáwaguñubei luágu gurúwa úara lúma Jesúsu. ³³Dan le jayárafadunbei lun Jesúsu, ába jaríjin luágu jiláali lan, ligía májalachun jamáali lubeí lúruna.

³⁴Ába liábin ában súdaara, ába límiruni Jesúsu loúbowagun táu ában efeín, ába láfuridun jítaü lúma dúna nígiñe. ³⁵Au Juan, le abúrújabalin le, ában le arjjubalin, áni aríñaga numúti inárüni, subúdi numúti luágu aríñaga nání inárüni lun gíne jaffínerun jugúya. ³⁶Ladúga lasúseredunbei buri cátei le, lun lagúnfulirun le taríñagubei Lerérun Búngiu. “Májalachúnwabei ni ában ábuu luágu.” ³⁷Aríñagati gíne tídan Lerérun Búngiu. “Jaríjubei le jímíragubei.”

Lábunajoún Jesúsu

(Mt. 27.57-61, Mr. 15.42-47, Lc. 23.50-56)

³⁸Lárigiñe sun cátei le, níñein ában wügüri Arimatéana, gíríti José, falá lumuti meja wügüri ligía Jesúsu, láu sun arámudaguarügü lan ladúga lanúfude jaweí juríu, ába lamúriajani lúgubu Jesúsu lúma Piláto. Ába líchuguni lun, ába lanúgüni José lúgubu Jesúsu. ³⁹Ába gíne liábin Nicodémo, lé meja nídünbei ayánuja lúma Jesúsu gúnoun, ába liábin láu sarágu ibíñe. ⁴⁰Ábati janúgüni José lúma Nicodémo lúgubu Jesúsu, ába jóuburaguni táu gamísa to túaguatu láu ibíñe ligía según jagáburi juríu lubá jábunajan. ⁴¹Níñein ában fulúri-ágei lídan fulásu le ní lubei jádaraguei Jesúsu luágu gurúwa, lídaanti fulásu ligía, níñein ában umúajäü iséri le mayúsurungili. ⁴²Níjin jíchigei lúgubu Jesúsu, ladúga yaráfa lan umúajäü ligía, ladúga gíne agúñeeli lan, gumése wéyu le eméraguagülei.

Lásaarun Jesúsu lídaangiñe ouweni

(Mt. 28. 1-10, Mr. 16. 1-8, Lc. 24.1-12)

20 ¹Wéyu dimáasu, lubá larúgan dan le búrigagili, ába tídin María Magdaléna aríjei umúajäü, dan tachúlürünbei ní, úaali dúbü le lidaú umúajäü ní. ²Ába tídin eíbaagueina le níjin wabei áu lúma Simón Pédro, ába taríñagun woun.

—Barújama Jesúsu lídaangiñe lumúaja, ibídiñeti woun jalía lan jíchigei.

³Ábati wáfuridun, ába wóudin luágun umúajäü. ⁴Úara wóudin bíangubei wagía eíbaagueina, furésetina lueí Pédro, ába nachúlürün furúmiñe luágu

umúajai. ⁵Ába nélemuchun aríja ñíjin, gamísa rügúñoun naríja ñi, mebélutina. ⁶Lárigiñe, ába lachúlürün Simón Pédro, ába lebélorun lídoun umúajai. Gamísa to aúboun lagúrawagua Jesúsu, tugúya rügúñoun gíñe laríja ñi. ⁷Gamísati to áboun loúbarawagúta lichúgü Jesúsu, máma lídaañoun ában túma tó buri áboun lagúrawagúta, joúburagu tíña, tábugua. ⁸Ába giñéti nebélorun, ába naríjini le asúseredubei, ába naffñerun luágu saráli lan Jesúsu lídaangiñe oúweni. ⁹Ligíaaliti gunfaráanda náni le taríñagubei Lerérun Búngiu luágu lásaaruba lan Jesúsu lídaangiñe oúweni. ¹⁰Ábati wagíribudun wábiñoun.

Larúfudagun Jesúsu lúngua tun María Magdaléna

(Mr. 16.9-11)

¹¹Ánjounti María, ába teréderun bougudi ayájuaaja lubádu umúajai. Sun nuján lan ayájua, ába télemuchun aríja lídoun umúajai, ¹²ába taríjin bián ánjeligu, jarútu jadáüragun, ñun le ñí lubeí buga lúgubu Jesúsu, ában lichúgügiñe, ában lugúdigíñe. ¹³Ába jaríñagun ánjeligu jagía tun.

—¿Ca uágu bayájua?

Taríñaga joun.

—Barújama Nabúreme, ibídiñeti nun jalía lan jíhigei.

¹⁴Quei taríñagun ítara, ába tadígiragun, ába taríjini Jesúsu, niján lan ñi, ibídiñeti tun luágu ligía lan. ¹⁵Ábati laríñagun Jesúsu tun.

—¿Ca uágu bayájuaaja? ¿Ca báluajabei?

Sun taríñaguti le oúnigirubalin fulúri-ágei adímurejabei tun, ába taríñagun lun.

—Ánjein banúgün lubeí, aríñagabei nun jalía lan bíhigei, barú námugei.

¹⁶Ábati laríñagun Jesúsu tun.

—¡María!

Ába tagáragun, ába taríñagun lun lídan jerérun jurú.

—¡Rabóni! —míni lan líra, Maésturu.

¹⁷Laríñaga Jesúsu tun.

—Márügüdába nuágu, ladúga maweínrungidina le ñíjin lubeí Núguchi. Beíba, baríñagame joun náni disípulugu luágu neíbuga lan le ñíjin lubeí Núguchi, le gíñe Júguchi, Nubúngiute le gíñe Jubúngiute.

¹⁸Ábati tídin María Magdaléna awísaraña disípulugu luágu aríja táali lan Jesúsu, áni aríñaga láni buri cátei le tun lun taríñaguni joun.

Larúfudagun Jesúsu lúngua joun disípulugu

(Mt. 28.16-20, Mr. 16.14-18, Lc. 24.36-49)

¹⁹Wéyu méme ligía gúñoun, oúndaragu jáña disípulugu, darúgu béna jáu ladúga janúfude jawéi jurú. Ába lebélorun Jesúsu, ába laráramun jamídaangua, ába labúsurun joun ítara.

—Níjeinlá darángilau jídan.

²⁰Lárigiñe laríñaguni líra, ába larúfuduni lújabu lúma loúba joun. Ába jagúndaaragun disípulugu láu jaríjini Jesúsu. ²¹Ábaya laríñagun Jesúsu joun.

—Níjeinlá darángilau jídan. Ítara quei loúnajanina Núguchi, ítara líña gíñe nouúnajanün.

²²Ábati láfurun jawágun, ába laríñagun joun.

—Resíbi jumeí Sífiri Sándu. ²³Ánjein ferúduna jumá jaffgoun ámu, ferúdnawaali, ánjein úa ferúduna jumáni, reídejali, úouga ferúdnawa lan.

Larjini Tomás Jesúsu lárigiñe lásaarun lídaangiñe ouweni

²⁴Tomás, ában jádaangiñe dúusu disípulugu le únbei jaríñaga Mádou, úatiti jáma dan le líabinbei Jesúsu. ²⁵Lárigiñe, ába jaríñagun ja jíbiri disípulugu lun.

—Aríja wamáali Wabúreme Jesúsu.

Ába laríñagun Tomás joun.

—Ánjein maríjin nan lárigi güirábu luágu lújabu, da neíme liraúraü nújabu lídoun júyu le lárigi güirábu, da nújabu lídoun louíba, siñábei naffñerun.

²⁶Wídü wéyu lárigiñe, oundaragu jáñaya disípulugu tídan ában múna, ññeinti Tomás jáma dan ligía. Láu sun darúgu líña lan béna jáu, ába lebélorun Jesúsu, ába laráramun jamídaangua, ába labúsurun joun ítara.

—Níjeinlá darángilau jídan.

²⁷Ába laríñagun lun Tomás.

—Dábei liraúraü bújabu ñájoun, aríja beíme nújabu, da beíme bújabu lídoun nouíba. Masígirabá láu liloúguan affñeni, affñebá luágu áu lan.

²⁸Ábati laríñagun Tomás.

—¡Nabúreme, Nubúngiute gíñe!

²⁹Laríñaga Jesúsu lun.

—Tomás, affñeedibu guetó, ladúga aríja báadina lan, gúndaatiña ja affñerubaña, maríjinga jamána.

Ca lan lébubei tabúrjóun líburu to

³⁰Adúgayati Jesúsu ámu sarágu miláguru jagíbugiñe láni disípulugu, le úabei búrüñu tídan líburu to. ³¹Labúrüdúnbei buri le lun jaffñerun luágu Jesúsu lan Crístubei, le Liraú Búngiu, lun gíñe láu lan jaffñerun, gabágari jumá queísi lánigu.

Larúfudagun Jesúsu lúngua joun sédü jádaangiñe láni disípulugu

21 ¹Lárigiñe, ábaya larúfudagun Jesúsu lúngua joun láni disípulugu láru dúna le gíribei Tibérias. Niján ligáburi ladúgüni. ²Lídaañanu ában Simón Pédro, Tomás le únbei jaríñaga Mádou, Natanaél, le lílana Caná le láni Galiléa, lirájüñü Zebedéo, jámaya bián jádaangiñe láni Jesúsu disípulugu. ³Ába laríñagun Simón Pédro joun.

—Neíbuga esénija.

Ába jaríñagun lun.

—Weíbuga gíñe búma.

Ába jádinun tídoun jagúne, ába jóúdin, mañúguntiña ni cáta árieibu ligía. ⁴Dan le arúgadeina lan, ába jaríjini Jesúsu ñi láru dúna, ibídiñetj yebe joun disípulugu luágu Jesúsu lan. ⁵Ábati laríñagun joun.

—Numádagu, ¿mañúgungidünsan?

Jaríñaga lun.

—Ni cáta.

⁶Ábati laríñagun Jesúsu joun.

—Fíjuma lueígiñe toúnwenren ibíti ugúnein, jañúguba.

Ába jágurun, lárigiñe siñá yebe jacháwarunun séni dúnarugugiñe le jíbe úduraü tídan. ⁷Ábati nariñagun, aú Juan, lun Pédro.

—¡Jesúsutia le!

Quei lagáambun Simón Pédro luágu Jesúsu lan, ába ladáürunun lanáangun, ába lachúbarun dúnarugun. ⁸Ja jíbiri disípulugu, ába jóúdin lárun béya táu ugúnein, adúrujeina jamoún séni buin jáu úduraü, quei ában rügúñein lan san báduñ jadise lueí béya. ⁹Dan le jarárirun múarugun, ába jadárirun wátu geméti láu eñéguraü, láu ában úduraü ligíbuagu túma fein. ¹⁰Ába laríñagun Jesúsu joun.

—Barújuma fiú jádaangiñe úduraü ja sun liñábei jañúguniña.

¹¹Ába ládínun Simón Pédro tídoun ugúnein, ába ladúrujanun séni lárun béya buin jáu úduraü weínamutiña, san dimí-san úrüwañanu, láu sun jíbe, majeíridaguntu séni. ¹²Ábati laríñagun Jesúsu joun.

—Jigoúgu, játa bacháti.

Úati ni ában jádaangiñe disípulugu álügüdüti cátei lan, ladúga subúdi jamáni luágu Jesúsu lan. ¹³Ába liábin, ába lanúgünun fein lújaburugu, ába líchugunun joun, ligía méme ladúga láu úduraü.

¹⁴Ligía lúrüwan larúfudagun Jesúsu lúngua joun láni disípulugu lárigi lásaarun lídaangiñe oúweni lúnya labágaridun.

Ladímurejan Jesúsu lúma Simón Pédro

¹⁵Lárigiñe játun bacháti, ába laríñagun Jesúsu lun Simón Pédro.

—Simón, Liraú Jonás, ¿jínsiñetinasan bun sügú jáu ja?

Laríñaga Pédro lun.

—Ánja, Nabúreme, subúditi bun luágu jínsiñe ban nun.

Ába laríñagun Jesúsu lun.

—Toúnigi báñati nánigu queísi ában jóúniri mudún buíti.

¹⁶Ábaya lálügüdüni luágu libíaman weíyaasu.

—Simón, liraú Jonás, ¿jínsiñetinasan bun le tímatimaati?

Laríñaga Pédro lun.

—Ánja, Nabúreme, subúditi bun luágu jínsiñe ban nun.

Laríñaga lun.

—Toúnigi báñati nánigu.

¹⁷Ábaya lálügüdüni luágu lúrüwan weíyaasu.

—Simón, liraú Jonás, ¿jínsiñetinasan bun?

Ába lírudagun Pédro ladúga lálügüdüni Jesúsu luágu lúruwan weíyaasu ánjein jínsiñe lubei lun, ába laríñagun lun.

—Nabúreme, subúsiiti sun cátei bun. Subúsiiti bun luágu jínsiñe ban nun.

Ába laríñagun Jesúsu lun.

—Toúnigi báñati nánigu queísi ában joúniri mudún buíti. ¹⁸Ninárün báu, luágu dan lán meja núraütimagidibu, ábaja badáuragun, ába bídin le ñíjin lumúti babúseera, dánme le weíyaadibu, iñúrarügübalime barúna, ábame ladáuraguagüdünibu ámu, ábame lanúgünibu le ñíjin lumúti mabúseerun ban bídin.

¹⁹Láu laríñaguni Jesúsu cátei le, lasúbudiragüdüñein ída lúba lan ligáburi louñwen Pédro, lun líchugun uweíriguni lun Búngiu láu. Lárigiñe, ába laríñagun lun.

—¡Falábana!

Disípulu le jínsiñegubei

²⁰Dan ladígiragúnbei Pédro, ába laríjinina, áu Juan, anángüran lan járigi, áu le jínsiñebei sarágu lun Jesúsu, le méme añúurubei loubagiñe Jesúsu lídan adíneruni, le gíñe álügüdübalin Jesúsu cába lan wádaangiñe edéregerei. ²¹Dan laríjinbalina Pédro, ába laríñagun lun Jesúsu.

—Nabúreme, ánsan le, ¿cábasan asúsereda lun?

²²Laríñaga Jesúsu lun.

—Ánjana busén labágaridun daríme nagíribudun, ¿cámegi burúma? Amúrü, falábana.

²³Ábati leíbaagun dimúrei jádan jíbiri lánigu Jesúsu luágu moúnwenbadina lán nege, maríñagunti Jesúsu luágu moúnwenbadina lan, aríñagarügüiti. “Ánjana busén labágaridun darí lúmoun nagíribudun, ¿cámegi burúma?”

²⁴Áu méme disípulu le, le achoúrurubalin buri cátei le, abúrúja náaru gíñe gárada to jalíjaboun guetó. Áni subúdiwati luágu inárüni lan le naríñagubei.

²⁵Níjein gíñe sarágu cátei ladúga Jesúsu, ánjein jamúga abúrújoúa ában ában, afíñetina luágu mábara tan jamúga buri líburu to abúrújoútu láu lídan sun uboú.